

CIKONDO CYÀ ÈKELEEZÌYÀ

WA SEEMÙNA

 Taatù mutàmbe kwikala wa Butùmbi, tudi ne disànkà dilòòlò edi dyà kumanya ne tudi munda mwètù ne Mwoyi wùdì kawùyi wùfwa. Mwoyi wà Nzambi wetù wàkatàpuluka mu ndimì yà kapyà ne kushikama pamutù pàà yônsò wa kùdìbo, ne bônsò bààkuujiibwa tèntè ne Nyumà Mwîmpè ne kubangabo kwakula mu myakulu mikwàbò bilondèshile mwàkabàpèèsha Nyumà mwà kwakula. Éyi Taatù, mùshindù mwinè wutùdì tuKusàkidila bwà muWàkaDipandululà munkaci mwà Èkèleeziyà. Kabyèna bikèmesha to mwàkambà Mukalenge wetù ne: “Mu ditùkù adi nenùmanyè ne Mêmè ndi munda mwà Taatù, ne Taatù munda Mwànyì, Mêmè munda mwènù, ne nwènù munda Mwànyì.” Mùshindù mwinè wùdì Nzambi wa mu Dyulu ùsòmbela munkaci mwà cisàmbà Cyèndè's wè! “Katancì kakesè aka bàà pa buloba kabààkuMmònà kàbìdì to, kàdi nwènù nenùMmònè, bwalu Néngìkalè neenù, munda mwènù mene too ne ku nshìikidilu kwà buloba.” Munda mwà cikondo ne cikondo cyônsò cyà èkèleeziyà Wêwè uvwa mwà kwikala kaaba aka, umwèumwè awu makèèlèlà, leelù, too ne kashidi, ne twètù tuvwa mwà kuKumanya ku byenzedi byÜdì wenza. “Bimanyinu ebi nebifilè aba bâdi bìtabuujà.”

² Mukalenge, pa kumònà—pa kumònà ditòngòbèlà dyà bikondo byônsò, cikondo cìkaadi pabwípì ne kupàtuka ne Cyendèlèlè kubangaci. Taatù Nzambi, tudi ne disànkà dyàbûngì dyà kumanya ne tudi ne mwoyi mu bàshààdilè abu leelù ewu; tutàngila nsòmbelu yètù ne tumònà mùshindù wà twipàcìlà tutùdì naatù, tubingìlà tutùdì naatù, ne tumònà ne Nyumà Mwîmpè mmwangàte bukòòkeshi. Nzambi, swàku bwà muntu yônsò udi mu Bwikadi bwà Nzambi dilòòlò edi àfikè ku dyumvwa bikondo byà èkèleeziyà bitùdì ne mwoyi ebi ne ànyeemenè ne lükàsà lwônsò kùdì Mukalenge Yesù, bwalu mbifundiibwe bitòòke tòò, ne: “Dînà dyà Mukalenge dìdi cibùmbà cikolè, baakànè bâdi bànyeemenaMù ne bàsanganyiibwa mu dikùbiibwa.”

³ Éyi Nzambi wa yààyà, lwâku dilòòlò edi ùlaabè buumùntù bwètù, Mukalenge. Lwâku ne balalakanyi, Éyi Mukalenge, bâdi mu cibwejàkàjì cikolè abu; tàngilàku mìkòòkò yìdì mikwàtè ne byà luse eyi, Mukalenge, kí mbamanyè cyà kwitabuuja to; kùdi balami bàà mìkòòkò bàbìikidila myaba yônsò. Tudi tulòmba, Taatù, bwà bàâtèèlejaku Mulami munène wa cisùmbù cyà mìkòòkò awu, Mukalenge Yesù, Nyumà Wendè munène awu

ngudi wakula dilòòlò edi, wàmba ne: “Wêwè mwan’Àànyì, lwâku kûNdì ne Mêmè nénkupèèshè Nsabatu, Diikisha dìdì dìkutwà citampì ku kwèbè kwà Cyendèlèèlè kûyaayà.” Bwà kubènga kutànkakajiibwa eku ne eku pa buloba patudi tumònà cikondo cyènda cijika mpindyewu apa. Enzàku nânku’s, Taatù. Akwìlàku kùdi mwakudi, tèèlejilàku mu macì à aba bàdi bâtèèlejà, bwalu twêtù bônsò tudi munkaci mwà kutèèleja. Mu Dînà dyà Yesù mmutùdì tulòmba emu. Amen.

⁴ Nudi mwà kusòmbaayi. Mpindyewu, dilòòlò edi tudi tulongela ku cikondo ciibidì cyà èkèleeziyà. Ndi mmòna bâàbûngì bâà kûdibo bâfunda bintu ne bikwâbò, nènku ki bwà cinyì ndi muswè kwikala kutòokesha cyôcì eci musangu wônsò.

⁵ Mpindyewu, cikondo ciibidì cyà èkèleeziyà cyàkabiìkidiibwa ne ncikondo cyà èkèleeziyà wa Seemùnà. Ne civwa cyenzèke, Cikondo cyà Seemùnà aci, cyàkabanga musangu wùmwèwùmwè wàkajikà Cikondo cyà Efèsò awu. Cikondo cyà Efèsò civwa kubangila ku cidimu cyà 55 cyà paanyimà pàà lufù lwà Yesù too ne ku cyà 170 paanyimà pàà lufù lwà Yesù. Cikondo cyà Seemùnà cyàkabanga mu cidimu cyà 170 kuyaci too ne ku cyà 312. Èkèleeziyà ewu ng’èkèleeziyà mukèngeshìlbwe; ewu udi uvwàla cifulu cyà butùmbi cyà mufwile diatabuuja awu, ng’èkèleeziyà wa dikènga dinène. Ne mulayì wa Nzambì kûdiye, kûdì Èkèleeziyà Musungula munda mwàcì, ùvwa mbwà kumupèèsha cifulu cyà butùmbi cyà Mwoyi.

⁶ Èkèleeziyà ne èkèleeziyà yônsò ùvwa ne mùtootò wùvvwà mukwàta mu cyanza cyà Nzambì, wùvvwà wùleejà “mùsànjeelà” mutùmina cikondo cyà èkèleeziyà aci. Wa mutàmbe bwîmpè wûndìku mùfwànyìne kwelela meeji ne ùvwa mùsànjeelà wa cikondo cyà èkèleeziyà wa Efèsò (bwalu Bible kêna wàmba ne ùvwa nganyì to) ùvwa m’Pôlò; bwalu yéyè ngwàkiimanyika èkèleeziyà wa beena Efèsò ne yéyè nguvwa mwambi wa cikondo cyà èkèleeziyà aci; wâkatwàdila Èkèleeziyà Bukenkè, bwalu Yone Munsantu wàkabwàngacila kwôkò aku. Ne pashiishe Polycarpe, ànu nânku too ne... Polycarpe’s wè, too ne kwinshi.

⁷ Mpindyewu, Cikondo cyà Seemùnà, ngeela meeji ne bwônsò... bândìku mêmè mupetè mùshindù wà kupeta, ùvwa ny’Irénée. Nènku mpindyewu ndi muswè kunwàmbila bwà cinyì ndi musungûle Irénée pamutù pàà Polycarpe. Mpindyewu, bâàbûngì bâà ku balombodi bônsò bâà èkèleeziyà (ne balongeshi bâà Bible) mbaswè kwela meeji ne mwanjèlo awu ùvwa m’Polycarpe. Polycarpe ùvwa muyiidi wa Yone Munsantu, aci ncilelèlè. Kàdi Polycarpe ngwâkatwà citampì... yéyè-yéyè nguvwa mufwile diatabuuja, bâàkamucimpika keelè mu mwoyi ne bâàkamushipa. Mpindyewu, kàdi yéyè ùvwa muntu munène, muntu wa luumù, muntu wa difwànà dyà Nzambì, wa kalolo. Kakùyi mpatà to umwe wa ku beena Kilistò bâà batàmbe

bunènè bàà kacya twâpeta. Ne kakùvwa cintu cibì nànsha cìmwè cyûvwàku mufwànyìne kwamba bwà wendè nsòmbel to.

⁸ Cîndì musungwile Irénée: mbwalu ndi ngiitabuuja ne Irénée ùvvwa mutàmbe kwikala museemène ku Mifündu kutàmба Polycarpe. Bwalu Polycarpe ùvvwa bu mweyémène ku mmwènenu wa cyena Loomò wa kujuula kwà bulongolodi kampànda. Kàdi—kàdi Irénée yéyè ùvvwa ùcìbènga wòsha ne munu mwíkù, yéyè wàkacìdyula bikolè be. Ne pashìshe, mutùdì bônsò bamanyè, cilumbù cinène cyà bàkòkanga civwa cîlwa ku Nsangilu wa Nicée; cìmwè cyà ku bilumbù binènè byà bàkòkelanganapù civwa cyà ne Nzambì ùvvwa bâsâtù anyì Nzambì ùvvwa *umwe*. Ki Irénée kwangatayè luseke lwà ne Nzambì ùvvwa Nzambì, mpindyewu, ànu Umwèpelè.

⁹ Ndi mufwànyìne kubala mu *Baataatù Bâà Kumpàlà Kwà Nicée*, mupimbu wà kumpàla, dibèjì dyà 412, ànu kaadìyì kamba kakesè cyanàànà; nwènù baswè kufunda aci, mupimbu wà kumpàla wà *Baataatù Bâà Kumpàlà Kwà Nicée*. Nènku mu dibèjì dyà dikùmi ne diibidì, cidi... Nwènù baswè mupimbu awu, ncitùpà cyà ndekeelu cyà mupimbu mwisâtù. Nudi bafwànyìne kubala cintu cyônsò aci mu kaabujimà; mùdi nshapità bûngì cyanàànà, anyì byambilu bûngì cyanàànà. Mpindyewu ndi mbanga kubadila ku yà ndekeelu—ànu ku mvensà yèndè makùmi àbìdì, anyi mvensà makùmi asatu yà ndekeelu. Ncyàkumubala yônsò to, kàdi ànu citùpà cyèndè cyanàànà:

“Byà momùmwè byakwidi bikwàbò byônsò abi biikàle... bipàtula mwânzù wa Kampànda umwèpelè ne umwèumwè awu;” (Nwamònù’s, ùdi ûteeta kwamba civwàbò bàMubiìkila ne: ‘Taatù, Mwânà, ne Nyumà Mwîmpè,’ ne kwambayè ne: “Ayi mmyânzù, kî mménà to, myânzù yà Kampànda Umwèpelè awu.” Ki cyôci aci menemene citùdì tulongesha leelù ewu.) “bu mudi, bu cileejilu” (ne pashìshe mu tubòkò) (“mu Anglais), *Mukalenge wa Bukolè, Mukalenge Taatù wa bwônsò, Nzambì wa Bukolè bwônsò, Mutàmbe bunène wa mu Dyulu, Mufuki, Mwenji*, ne byà nànku awu abi. Ebi kî mménà ne myânzù yà dilondangana dyà bantu bashìllàngane to, kàdi yà umwèpelè ne umwèumwè awu,” (Amen!) “ku dînà dyà Nzambì umwèpelè ewu, Taatù, udi... Yéyè—Yéyè udi bintu byônsò ebi... upêësha bônsò... diikalakù, dyèsè dinène dyà diikalakù.”

¹⁰ Irénée ùdi wàmba ne “Myânzù yônsò eyi mmisangisha mu Dînà dîmwèpelè, mwinshi mwà Nzambì umwèpelè, ne yìdi ànu myânzù yà civwàYe aci.” Ùvvwa Rose wa Shalonà. Ki civwàYe ncyôci aci. Awu’s mmwânzù. Yéyè ùvvwa Mûtootò wà mu Dîndà. Ùvvwa Alpha. Ùvvwa Omega. Ayi’s mmyânzù yà civwàYe. Yéyè ùvvwa Taatù. Ùvvwa Mwânà. Ùvvwa Nyumà Mwîmpè. Kàdi kùdi Nzambì umwèpelè. Nzambì umwèpelè, ne Dînà Dyèndè didi Dimwèpelè. Nènku ki cîndì mêmè mwelèle meeji ne Irénée

nguvwa mwambìlemù mu ditaata dyèndè—dyèndè dyà cilumbu aci kaaba aka, anyì dyumvwija dyà Mufündu awu.

¹¹ Cikwàbò cintu cîndì muswè kunùbadila, cidi cìsanganyiibwa mu mukàndà ewu: *Mmunyi Mwàkenzekaci?* Ne eci nkùdì bafündì bàà maalu-malonda. Nenku: *Mmunyi Mwàkenzekaci?* kùdì R. C. Hazeltine, maalu-malonda à èkèleeyiyà yà ku cibangidilu. Kàdi apa mu dibèjì dyà 180: “Mapà À Nyumà Mu Cikondo Cyà Irénée, cidimu cyà 177 too ne ku cyà 202 paanyimà pàà lufù lwà Yesù.” Mpindyewu, cîndì ntèèlala cyôcì eci, ciyaaya pa mikàbà yà méyì, nudi numònà’s, ne—ne necyàngaciibwè cîfundiibwè mu mikàndà:

“Mùvvwa mmu cikondo cyà Irénée mùvvwà èkèleeyiyà wa mutàmbe kwikalà wa Ciòpostòlò wa mu France mwikàle ne mapà ônsò à Nyumà Mwîmpè.” Cìvwa nku dilongesha dyèndè, nwamònù’s. “Bidimba byà èkèleeyiyà wa Irénée ku Lyon,” n’Lyon, mu France, “bàvwa bààkula mu myakulu. Kacivwa cintu cyà pabwàcì to bwà kumònà muntu mufwè wàlukila ku mwoyi. Dyondopiibwa divwa—dyondopiibwa divwa cintu cyà cyènzechenzeka matùkù ônsò mu butangadiki bwônsò... èkèleeyiyà yà butangadiki myaba yônsò.” Irénée awu’s ùvvwa mumanyè mwà kulongesha! “Bishimà bìvwa byènzeka misangu ne misangu. Bwà kwamba menemene, èkèleeyiyà ayi kayìvwakù yipanga kwikalà ne dimwènesha dya bwikadi bwà Nzambi ku bishimà anyì ku bìkèènà-kumònà, diimanyika dyà bintu byà mu bufùki, ku cishimà, bwà kuvùlwija beena Kilistò bàà mudimu wà butangadiki bàà mu ditùkù adi ne, bàvwa bayiidi Bèndè bananga. Kàdi ku maalu-malonda à matùkù à kale, katwènakù mwà kwangulula kasangu nànsha kàà dijuula dyà bafwè mu èkèleeyiyà wa kumpalà wa cyena Loomo awu to.”

¹² Abu mbantu bàdì kabàyì... kabàyikù bàjinga byà elu luseke anyì lwàlwa to, bôbò bàdì bàmba ànu bulelèlè. Bôbò mbafündì bàà maalu-malonda.

¹³ Ki bwà cinyì ndi mêmè ngeela meeji ne Irénée, bwalu, nudi numònà’s, ùvvwa ne diitabuuja dimwèdimwè dìvvwà Pôlò ne bayiidi batùpèèshe adi’s. Ki bwà cinyì mêmè ndi ne... ngeela meeji ne yéyè nguvwa mwanjèlo wa èkèleeyiyà wa Seemùnà, bwalu yéyè ùvvwa... ùvvwa ne malongesha àmwèàmwè à mu Mifündu awu; ne malongesha àmwèàmwè à mu Mifündu pa bishimikidi byà Dîyì dyà Nzambi nebìtwalè cintu cìmwècimwè aci musangu wônsò. Bu nwènù mwà kwangata ànu cyanàànà mémì àdì àkèngelà kwamba à Nzambi ne kuàkùmbaja ku dileeta ne ku dìleeta, cidi èkèleeyiyà yàmba nànsha ciikàle cinyì, ucilonda ànu mùshindù wùdici cyambè awu, necìtwalè cintu cìmwècimwè aci. Nenku’s ki cyôcì aci cyàkenzà Irénée.

¹⁴ Mpindyewu, ndi ngeela meeji ne Polycarpe ùvvwa muntu mwîmpè maalu, ndi ngumvwà nànkú; kàdi ndi ngamba ne yéyè ùvvwa mutàmbe kweyemena ku divwija dyà èkèleeyiyà

bulongolodi, nènku ànu mùvvwà beena Nikàlàwù bènza amu. Bàvwa bôbò bàvvija èkèleeziyà bulongolodi, ne—ne kusanga pàmwè kwà bwâna bwètù. Bidi bìmwèka ànu bîmpè mu mùshindù wà mamanya à mu mutù, kàdi, nudi numònà's, Nyumà ùdi kule menemene ne mamanya à mu mitù awu mu mùshindù wà ne... kùyikù nànsha mene mwà kwela meeji bîmpè ku—ku Nyumà to. "Meeji Àànyì matumbùke mmatàmbe ènù meeji," mùdì Nzambì wàmба. "Yànyì njila mmibànde kutàmба yènù njila." Pa nànkú kùdi mùshindù ànu wùmwèpelè wà kwenza cyòcì aci; kuMulonda ànu cyanàànà ku dizòla. Ncyà bushùwà.

¹⁵ Mpindyewu, tudi bafwànyìne kwela meeji ne, wêwè mwà kuumuka apa... Bu ne mvwa nya ku Chicago dìlòòlò edi, mvwa mufwànyìne kupàtuka apa kuya kadikèbelà kaleeji-nord, kwamba ne: "Mpindyewu, twänjìbi kumònà tûng, Chicago's ùdi ùsanganyiibwa lwà eku. Eyo, néngasè ànu lwendu nye." Ncyêna mufwànyìne kupàtuka mu Jeffersonville to. Nwamònú anyì? Bìkèngela mpeté kartà kàà njila. Nènku kùdi—kùdi mwaba... njila mululàmè bwà ngaamònà mwà kuya ku Chicago mu mèbà àsambòmbò anyì mwandamutekète à lwendu lwà mu kàshinyi, kàdi ncyénà ànu mwà kukòsa njila kanà yônsò ewu to. Ndékè kénà ànu mwà kukòsa njila kanà yônsò ewu to. yéyè ùdi ne nji—njila wa mu lupeepèle anyì butumbùke kampànda ne bikwàbò bùdì bùkèngelà bwà kubùukayè, bwà mu bipidì bûngì kampànda mùdì mùkèngelà bwà kushààlayè.

¹⁶ Kùdi njila museba, ne Nzambì ùdi ne njila kampànda. Nzambì ùdi ne njila bwà Èkèleeziyà Wendè, bwà cisàmbà Cyèndè. Ne kacya Yéyè kàvvakù ne meeji à kwikalà Yè mukòntonona kùdi baapaapà, baakàrdinalè, barkèèpiskòpò bàà batàmbidile, anyì batàngidi banènè to. Nyumà Mwîmpè ngudi Ndeeji wa Èkèleeziyà wa Nzambì udi ne mwoyi, bwà kuMukolesha. Nènku bunsantu bwônsò kabwèna bùya kùdi kàrdinalè anyì nsaserdòsè, bwà kumuvwija muntu munsantu mu—mu èkèleeziyà, anyì ní ncinyi cyônsò to. Beena kwitabuuja bàà pàtupù's bâdi ànu ne bukenji... bukenji bwà menemene kùdi Nyumà Mwîmpè mùdì muyiishi kanà yônsò ewu, mpaasàtà, mulami, mulubuludi, anyì ní nganyì mukwàbò. Beena kwitabuuja bàà patupù aba's!

¹⁷ Kàdi cìdìbo bacìbìkìdila ne *mbeena Nikàlàwù*, bu mutwàmònú makèélèlà dìlòòlò awu, *mwena Nikàlàwù*, tuvwa basùnsùle mwakù awu, bawängàcilè mu cyena Ngelikà, ne n-i-c-k-o awu, ùvwa ùmvwija *nikao*, ciikàle cyùmvwija ne "kucimuna, anyì kunyènga bukòòkeshi." Cinyì? N-i-c-k-o, *mwena Nikàlàwù*, *beena kwitabuuja bàà pàtupù*, "kucimuna beena kwitabuuja bàà pàtupù," ne kubànyènga bukòòkeshi mu kubàpèèsha dìyì ditùmà dyà bantu, balombodi bàà èkèleeziyà bàvvà mwà kubalongesha, bàvvà mwà kwikalà ne dyoya dyà myandà dyàbò sungasunga. Awu ki mùshindù wùvvwà Nsangilu wa Nicée mulombòdiibwe. Bwalu bààbûngì bààkadìsanga ne kulongololabò dìyì ditùma mu

Nsangilu wa Nicée amu. Katwèna . . . katwèna baswè kwakula bipitèpîte bûngì pa bwalu abu to, bwalu aci ncyà mu diinaayi dilòòlò, cyà mu Nsangilu wa Nicée aci.

¹⁸ Kàdi ki mwaba ngwôwò awu wàkenjiibwà Èkèleeziyà wa Kâtòlikè wa cyena Loomo, mupâtùkile mu kasùmbù kàà bantu bàvvà bakùdimwisha mucimà kùdì Pôlò Munsantu, ne Irénée, ne Martin Munsantu, too ne kwinshì. Bâvwa beena Kilistò bakùdìmùne mucimà kùdì . . . buumùke ku bumpàngaanù bayè ku bwena Kilistò, kàdi baswè kukòka èkèleeziyà kumwaluja mu mmwènekelu wa mudimu wà bwambi wà Dipungila Dikùlukulu, bu mùdi kwikala ne baakwidi banène, ne—ne dishìlangana dyà nkwasà dyà cìipostòlò, bu mùdi byà ne paapà ûshiìla mukwàbò paapà, mukwàbò paapà. Bu twêtù mwà kükèbulula mu Bible mujimà emu, s'nuди bafwànyine kujandula ne aci mbulelèlè ànu bwètù bwà menemene ebu ne mwàkapìishà Nzambì cintu aci kacya ku cibangidilu aku mene; nènku cikondo cyà èkèleeziyà cyà dilòòlò dyà makèèlèlè adi, mwambè ne: “Mêmè ndi mucikiné!” ne Èkèleeziyà mucikiné pèndè.

¹⁹ Kacya Nzambì kàvvakù ne meeji à Èkèleeziyà kulombodiibwayè kùdì bantu nànsha. Nzambì ngudi ulombola Èkèleeziyà Wendè, ne Üdi ùmulombwela ku mapà à Nyumà. Mapà à Nyumà àdi mu Èkèleeziyà bwà kulongolola nyumà. Üdi ne midimu ya bwambi yitaanu mu Èkèleeziyà Wendè. Bâà kumpàlà bâà ku bôbò mbàpostòlò, anyì, bampandanjila. Mpandanjila ki dibììkila dyà ditàmbe kutùmbuka dìdìku, mùpostòlò. Mwakù ewu mpandanjila wùdi wùmvwija ne “mutùmìibwe”; mùpostòlò mbwena kwamba ne “mutùmìibwe.” Cyàkasungwilàbo bwà kubiìkidiibwabò ne mpandanjila, mêmè ncyéna pàànyì mumanyè bwalà. Kàdi mbàpostòlò. Eyo. Bâpostòlò, bapròfetà, balongeshi, batangadiki, bampaasàtà. Mpindyewu, ayi ki midimu misungula yà Nzambì mitùmina Èkèleeziyà Wendè.

²⁰ Pashìishe mu èkèleeziyà yônsò wa pa kaaba mùdi mapà à Nyumà citéémà àdi àlwà munkaci mwà bantu, mbwena kwamba ne, dimanya, lungènyì, mapà à dyondopa, dyenza dyà bishimà, dyakula dyà mu myakulu, dyandamuna dyà myakulu. Ne bintu byônsò ebi bìdi biya mu mubidi ne mubidi wà pa kaaba. Ne muntu yônsò mu èkèleeziyà udi ne mudimu wa bwambi wà muntu-nkààyà, ne mudimu wà bwambi wà muntu-nkààyà awu wùdi wènda pàmwè ne mikwàbò midimu yà bwambi, bwà kwibaka Mubidi wà Yesù Kilistò. Nènku kacya . . .

²¹ Mpindyewu, vùlkààyi eci ne, eci cidi . . . Nêngélè milongo eyi dilòòlò edi. Èkèleeziyà wa kumpàlà, Efèsò; Seemùnà, Peegàmò, Twatilà, Saadì, Filàdèlèfiyà, Laòdikiyà. Mpindyewu, vùlkààyi pàdì eci cítungunuka apa ne, ewu èkèleeziyà ûvwva ne kaabujimà kàà Nyumà, kàdi kundekeelu kwà cikondo cyà èkèleeziyà tudi tusangana ne Ùvwa musàkìibwe pambèlu.

Cikondo cyà èkèleeziyà cìvwà cilondèle cyàkasàka kàbìdì ndambù; kàbìdì ndambù; too ne ku *eci* nùnku, kùvwa ànu katobà kakesè menemene. “Udi ne ndambù wa bintu,” mwàkambà Ye. Kaa, patwàfikà ku Cikondo cyà Èkèleeziyà cyà Twatilà aci’s wè!

²² Mpindyewu, paanyimà pàà aci cimanè kulwa, Nzambi wàkajuula mwnena Allemagne dînà dyèndè Martin Luther wâkaaluja cyàkàbìdì Èkèleeziyà awu. Wàkabanga cyàkàbìdì ndambù, kuyiishayè Dibingishiibwa; pashiishe kulwaku Martin Luther, kuyiishayè Dibingishiibwa. Pashiishe kulwakù John Wesley ne kuyiishayè Dijidiibwa. Pashiishe *apa* mu eci cikondo cyà èkèleeziyà, bààkaalukila buludì ku Dibàtiiza dyà Nyumà Mwîmpè, ne bimanyinu bimwèbimwè abi ne maalu à kukèma, bipweka buludì. *Apa* ki pààkapàtukilaye è kupicila mu bidimu cinunu ne nkàmà yìtaanu byà Bikondo Byà Mídimà. Ne ki mwômò amu mùvvà mutambe kwikala mîdimà . . anyì cipungu citàmbe bule cyà èkèleeziyà citùkaadiku bapetè mu bikondo byà èkèleeziyà. Pashiishe pôpò *apa* ki pàdici cìbanga kujuuka, Dibingishiibwa, Dijidiibwa, Dibàtiiza dyà Nyumà Mwîmpè. Ne Bible mmwambè ne: “Ku ndekeelu kwà *eci* cikondo, ne banyààbanyà bakesè aba neba fimpakajiibwè pansi bwalu èkèleeziyà umwèumwè wa Mpenta awu neàbangè kwenza cintu cìmwècìmwè cìvwàbo babangè kwenza *apa* kale aci, beena Nikàlìawù.” (Eyi Nzambi, ndamèku mukana mubwikila too ne pângààfikà ku cyôcì aci.) Nudi numònà anyì? Cîndi mwà kumònà mwaba awu aci. Nwamònou’s, too ne panwìkalà mwà kumònà apa. Nènku nênnùleejè ne musàanjeela mutùmina eci cikondo cyà èkèleeziyà neàkinè màngumba. Nyumà awu neàjuukilè mu bânà. Ki mütùbi misangu yônsò. Nènku mpindyewu tudi ne . . .

²³ Mpindyewu, bu nwénù mwà kumònà eci, mùvvà Ye munène apa, kupàtuka, ne ndekeelu wa byônsò kuMupàtakaja ne pembèlu pônsò. Pashiishe Cyôcì kubanga kwalukila. Luther kuCìkòkayè paanyimà, Dibingishiibwa; Dijidiibwa; Dibàtiiza dyà Nyumà Mwîmpè; ne pashiishe ànu ku ndekeelu kwà cikondo, ùdi ùMupàtakajila pansi, mu müşhindù wà ne Eci ncyambè kujima ànu cyônsò, kùkaadi ànu kantu kakesè menemene mwaba awu, ne ki pàdiye wèla lubilà lukolè ne “Yéyè kàyi mwipìdije mudimu awu bwà bwalu bwà Basungula to, kakwàkwikalà musunya nànsha mukesè wàsùngidiibwà to.” Nwamònou anyì? Ki bwalu mbwòbù abu’s, ànu ku cikondo cyà nshìikidilu mene. Mpindyewu lamààyi aci mu meeji.

²⁴ Mpindyewu netwìkalè mwà kubanga Cikondo cyà Èkèleeziyà wa Seemùnà eci. Dyàmbedi ndi muswè kucisùnsulula pa dibèjì kampànda dîndì—dîndì naadi edi. Mpindyewu, cikondo ciibìdi cyà èkèleeziyà cìvwa n’Seemùnà, ne ndi ngeela meeji ne nwénù bônsò nenùtwe ku cyànyì (anyì ndi ntékemena ne nudi batwè ku cyànyì, nànsha byà ndambù, mwine’s) ne Irénée nguvwa mùtootò mutùmina cikondo cyà èkèleeziyà aci. Yéyè nguvwa mùsàanjeelà wa Nzambi awu bwalu mmusaasùlùjè

ditÙngà dijimà adi, mu France (mu Gaule), muntwamu, ne yéyè wàkashindamija maèkèleeziyà, ne yônsò wa ku ôwò ùvwa mushìndamija pa dibàtìiza dyà Nyumà Mwîmpè, dyakula dyà mu myakulu, dibìishà dyà bafwè, dyondopa dyà babèedì, diimanyika dyà mvùla, ne dyenza dyà bishìmà ku ditùkù ne ku ditùkù. Bâvwa bamanyè ne Nzambì udi ne mwoyi ùvwa ne mwoyi munkaci mwà cisàmbà. Awu nguvwa mulùme wa Nzambì, bwalu Yesù wàkamba ne: "Muntu nànsha umwe kêna mwà kwenza . . ." Anyì, ba—bantu abu mbàvvà bambè ne: "Muntu nànsha umwe kêna mwà kwenza byenzedi ebi Nzambì kàyi nendè to." Ùvwa n'Nikòdemè wâkambilà Yesù nànkù.

²⁵ Mpindyewu, cimenga cyà bungèndààmùshìngà; cipàtukidi cyà bungèndààmùshìngà bwà kuya ku Lydie ne ku wesètè. Cimenga ciisâtù cyà citàmbe bunène mu Asie, cimenga cinènè cyà ku cisabù. Cimanya bwà bubanji, ntempèlù, nzùbu, bilongelu, manga à lwôndapu ne maalu à mamanya. Beena Yùda bâvwa basòmbèle mu—mu Seemùnà, ne bâvwa bâyiisha èvànjeeliyò kùdì beena mu Seemùnà. Polycarpe nguvwa mwèpiskòpò wa kumpàla wa Seemùnà. Polycarpe ne bakwàbò basadidi bàà lulamatu bààkashindamija diitabuuja dyondòke dyà Nzambì mu beena kwitabuuja bàà mu Seemùnà. Baataatù bàà ku cibangidilu bàà èkèleeziyà bâvwa bâfila dikànkamika dyà Bulelèlè kùdì Seemùnà.

²⁶ Cikondo cyà èkèleeziyà wa Seemùnà, dînà dyà èkèleeziyà awu divwa n'Seemùnà, *Seemùnà*, èyowà's wè, cìdi cyùmvwija ne "bululu," muulà. Nciswikàkàne ne lufù, bwalu bâvvà bâpùnga ne lufù.

²⁷ Èkèleeziyà mukèngèshiìbwe, Nzambì wàkabàbìkila ne "mukèngèshiìbwe." Nzambì wàkatàngija mêsù pa makèngeshiibwa àbò, ne wàkafilà ngâsà bwà kuàtwalabò. Wàkatàngija mêsù pa makèngeshiibwa àbò, ne kubàpèèsha bucìmunyi pa lufù. Wàkatàngija mêsù pa bupèlè bwàbò, ne kubàpèèsha mabanji munda Mwèndè. Èkèleeziyà wa Seemùnà wàkapìcila mu cikùtù cyà kapyà cyà makèngeshiibwa, kàdi, cìvwa mmupùuyà wà dipembu dîmpè kùdìYe. Ki Bâshààdìlè abu mpindyewu, kî ng'èkèleeziyà wa beena Seemùnà yônsò mu kaabujimà to; ànu Bâshààdìlè abu mbândì ngamba. *Matùkù manène dikùmì à dikènga dinène* awu mbwena kwamba ne "bidimu dikùmì byà dikèngeshiibwa dyà mashi."

²⁸ Ncyêna mumanyè ní ndi mwà kwamba dînà edi ku dileetà ku dileetà, anyì kudishindumuna, anyì to. Ewu nguvwa mfùmù wa bukalenge bwalàbàle mu cikondo aci, ngeela meeji ne yéyè nguvwa mwedi wa mashi pansiì wa mutàmbe bunène ku bônsò kacya ku Néron mu cidimu cya 67: D-i-o-c-l-é-t-i-e-n. Mu bidimu byà kuumukila ku cyà 303 too ne ku cyà 312 paanyimà pàà lufù lwà Yesù.

²⁹ Nzambì ùdi ùkànkamika Seemùnà bwà kwikalayè ne lulamatú too ne ku lufù, mwàkadiYe Yéyè amu ne: “Nènku Nénkupèeshè cifulu cyà butùmbì cyà Mwoyi, mùdì Taatù muMpèeshe.” Nzambì mmulayè mucìmunyi (mu makèngeshiibwa à makolè) bucìmunyi pa lufù lwibidì ne: “Kanùciìnyi aba bàdì mwà kushipa mubidi to, kàdi Ewu udi mwà kubùtula musùùkà, anyì, kushipa musùùkà.” Cìdi... Bìvwa bìkèngela bwà beena Seemùnà kunànukilabò too ne ku ndekeelu: “Kùciìnyi bantu nànsha, nènku cifulu cyà butùmbì cyà Mwoyi necikupèebwè.” Dikèngeshiibwa dyà bwena Kilistò mu bikondo ndifwànyìkìjìlbwe mu bikondo byà èkèleeziya, dyà Seemùnà, mbyà mushinga wàbùngì be. Netùswe bwà kukùfika ànu mu katancì kakesè emu, bu Mukalenge mwà kwanyisha.

³⁰ Mpindyewu, bàmwè bàà kunùdì bìmwè byà ku byôbì ebi byôbì bibàpítè...mêmè mubifùnde ndambù ne lükàsà lukolè bwà bakwàbò bàà mu kàalaasà emu, dîbà adi netwìkalè... tudi...mbushùwà ne nudi mwà kubipetela kutùdì dîbà kanà dyônsò dinùdì baswè kubipeta adi, netwìkalè ne disànkà dyà-dyà kunùpèeshabì. (Mfwilaayikù luse.)

³¹ Mpindyewu mu nshapità mwi2 ku mvensà wa 8, nkutùdì tubangila dilòòlò edi. Mpindyewu, mpa cinyì patùvwà baMushiìle makèèlèlè diloòlò awu? Mbushùwà ne yéyè ûvwa... mukine byà bwena Nikàlawù abi. Ncyà bushùwà anyì? Mpindyewu cìdi Nzambì wènza ncinyì? Cìdi cìkèngela bwà twétù kwikala bajandule dyàmbedi ncinyì? Dibuuludiibwa dyà Yesù Kilistò, dyà ne Yéyè ùdi Nganyì ne Yéyè ùdi cinyì. Mpindyewu cintu cinènè cìdi cilondà, tudi tujandula ne Yéyè ùdi úkìna cintu kanà cyônsò cìikàla mwà kutèèka cintu kampànda bwà kukòòkeshaci Èkèleeziyà Wendè pa kuumusha Yéyè mwinè. Yéyè ùdi Nzambì wa mukàwù.

³² Mùshindù mwinè wûndì njinga kwimanyika's, bwalu tudi ne mvensà ànu yìnaayi cyanàànà kaaba aka, ànu bwà kutèèla kaacintu kampànda kakesè. Mbanganyì bâdiku mwà kuvùluka pàvvà mupròfetà mwîmpè, Samwèlè awu, pàvvà Izàlèlè mujimà ùswa kwenza maalu mùdì bakwàbò bàà pa buloba amu? Nudi bavùlùke aci anyì? Ki mupròfetà kubàmbilayè, wàmба ne: “Nudi bapìile!” Kàdi bàvwa bàjinga kwenza maalu bu beena Pelèshètè, ne mùdì ba—bakwàbò abu. Èè, ki cyôcì aci menemene cyàkenzekà mu cikondo cyà kumpàlè cyà èkèleeziyà eci. Mbyà bikèmesha mùdì bantu kabàyi baswè bwà Nzambì àbàlombòlè. Bôbò mbaswè kulonda...mbaswè muntu kampànda. Izàlèlè, wàkenza cilèmà cyà citàmbe bunènè cikaadiyeku mwenze, pàvvà...Ngásà ùkaavwa mubàpetela mupròfetà, mulombodi, mubàlongolwèle mwânà wa mùkòòkò bu difuta dyà cibawu, ne mubàlongolwèle cyàkudyà cyà mu maulu, ne bintu bìmpè byônsò bìvvà ngásà mubàlongolwèle abi, kàdi nànsha nànkù, mu Ekèsòode 19, bàvwa baswè mikenji. Bàvwa baswè kuvwijangana

ba-docteurs mu bunzambi, ne kupeta bantu kampànda, bàvwa baswè kwikala pààbò ne cintu kampàndà cyà dyenzaMù.

³³ Muntu ùtu misangu yônsò ànu ùkèba bwà kutàmba Mufuki mwine wâkamufuka awu ku meeji, pèndè kénéne ne cidiye wènza nànsha cìmwè to ànu kudishebeya yéyé mwinè. Ànu mûmvwa muysiishè kùkaadi maadyàlumingu ndambù pa—pa *Ntèndeleelu Musopakaja*. Ne aci's mmwômò menemene. Panùdî nusopakaja cintu kanà cyônsò eci, kacyènakù mwà...bwàcì mbutùuke! Kwàjiki, kacyèna mwà kwalukila kàbìdì to. Kampundu kakèènakù mwà kulela cyàkàbìdì ne kupeta kampundu kakwàbò to, bwalu kôkô—kôkô nkampundu, ndimiinu disopakaja. Ditalà dilenga, kwêna mwà kupetela ditalà dilenga ku ditalà dilenga disopakaja nànsha. Kàdyàkwikalà nànsha...Ndifwànyine kutòloka, kàdi dìdi—dìdi, kaa, kî ndîmpèku to nànsha kakesè. Kwêna mwà kucyènzakù to. Cyônsò cidi cisopakaja kí ncîmpèku to.

³⁴ Ne ntèndeleelu musopakaja kí mmwîmpèku to! Paùcìdî ànu uteeta bwà kusàkidila cintu kampànda ku cidi Nzambi mwambè, anyì wènza cintu kampàndà cidi Nzambi kàyi muswè bwà wêwè kwenza to, awu nntèndeleelu musopakaja. Ncifwànyine kwikala ne mmwènekelu mulenga. Kaa, ditalà disopakaja nedìükale ne mmwènekelu mulenga kutàmba ditalà dyà mu bufuki. Kampundu kàà kale nekénzè mudimu kutàmba wà tubalù tûbìdî. Èè, aci's...Kí nku dyenza dyà mudimu to, mwanèètù, ku ngâsà nkutùdi basÙngidilìbwé. “Kí nku byenzedi kutùdi basÙngidilìbwé to, kàdi nku ngâsà.” Pa nànkú aci ncifwànyine... Ndi ntékemena ne kanwèna nwela meeji ne mèyì aa...Udi—udi musòmbe mu cikondo cyà diteeciibwa dikolé, ne mêmè ndi—ndi ncyùmvwa kùneeku eku. Nudi numònà anyì? Bwalu kùdi ba-Presbytériens, ba-Méthodistes, ne bâà mìshindù yônsò mwab'ewu. Aci tudi bamanyè. Nènku ndi—ndi ncyùmvwa. Ne bikèngela wìkalè wololokakù ndambù ku musangu ne ku musangu, bwà kudyùmushaci, mùshindù awu.

³⁵ Mpindyewu, tèèlejààyi. Cintu cyônsò cisopakaja eci kî ncîmpèku to. Bikèngela wàngatè cyà ku muji, mùshindù wùdi Nzambi mucyènzè awu, dîbà adi udi ne cintu cyà cilelèlè.

³⁶ Mpindyewu, tudi tusangana dîbà adi ne èkèleziyà wa Izàlèlèlè awu, pàvvàbo bàpità bènda bàya apu, Nzambi ùkaavwa mubàdììshèdìs, ne mubàkùbékùbe, ne mubéñzèlèñzèlè bintu byônsò. Kàdi ndekeelu wa byônsò kutàngijabò mésù kùdî beena Pelèshètè, ne beena Amòlè, ne...ne bashììlèshììlàngâne abu, ki bôbò ne: “Tudi baswè mfumù! Bâdi ne cintu kampànda citùdi twêtù katuyì naacì to.”

³⁷ Ki cintu cìmwècìmwè cidi bantu bènza leelù ewu ncyôci aci. Umwe wa ku aba, bânà bëètù bâà bakàjì aba, neàtangilè ku télèviziyô bwà kumònà Gloria Swanson, anyì nî nganyì yônsò udibò...bàmwè bâà ku bakàjì bâdî bavwàle nkanzu wa

mùshindù kampànda abu, ne bôbò kabàyikù ànu mwà kucìtwàla to ànu pàdìbo bàmupeta. Nwamònù anyì? Wêwè umònà mukàjì kampànda mu ville ne: "Kaa, awu kî mmulenga anyì?" Cìdiye muvwàle ncifwànyìne kukwenzela cinyì? Bantu, bâdi ànu nànkù awu, même's ntu mwambè ne nditùkù dyà—dyà ditentulangana, muntu muswè kutentula mukwèndè. Wangata . . . Kùdi ba-Elvis Presley bûngì cyanàànà mpindyewu, ndi—ndi nnwàmbila, kùyikù mufwànyìne kubùngwija mu màkaadikà to, bwalu ùkaadi mulwè mumanyike mu dyenza dyà misambu dyà musuny—. . . ditetulangana's wè!

³⁸ Tudi ne cintu cìmwècìmwè aci mu ntèndeelu. Kùdì . . . Mvwa mbala bwalu-bulonda bwà Martin Luther, ne yônsò wa ku nwénù balongi bàà maalu-malonda mmumanyè. Mbambè ne kacìvwa cintu cyà kaciyi cyùmvwika to mùvvà Luther mwà kutontolola èkèleeziyà wa Kàtòlikè kàyi ùnyookiibwa to, kàdi bwalu-busokoka bunène, mbwà mùvvàye mwà kukolela dikolesha dyônsò dyà maalu dyàkalondà ditàbuluja dyèndè adi kàdi kutùngunu ka ànu ne kushààla ne Díyi. Ki cishìmà neyòcì aci, mùvvà Nzambì mumulamè mukezùke ne mululàme amu.

³⁹ Mpindyewu, ki kulwabo kùdì Samwèlè ewu. Kwambabò ne: "Twéñzèlè bu—. . . anyì ùtùtèèkèlè mfù—mfùmù." Ki Mukalenge kumwambila Yè ne Yèyè ûvwa mubènge mmwènenu awu, ànu menemene cyàkabèngelà Ye kaaba aka bulongolodi aci.

⁴⁰ Ànu mwàkabèngà Ye aci amu, Yéyè ùdi ùbènga malongolodi. Kêna ùbènga ndongolwelu to, kàdi bulongolodi. Ndongolwelu, bìdi bikèngela twikalè nendè. Kàdi bulongolodi kabyèna bikèngela twikalè naabù to, bwalu bùdi bwèlelangana mikàlu ne: "Twêtù tudi *Baakampànda*." Udi mwena Kilistò anyì? "Mêmè ndi Méthodiste." Udi mwena Kilistò anyì? "Mêmè ndi Baptiste." Aci kacyèna ne cìdici cyùmvwija citàmbe ngulube mu lupangu to. Aci kacyèna ne dipetangana naaCì to, nànsa kakesé. Mwena Kilistò!

⁴¹ Mvwa mwelè mwânà wa bakàjì kampànda lukonko dilòòlò adi, pa cibùmbà cyà ku cyambilu ne: "Udi mwena Kilistò anyì?"

Kwambayè ne: "Mònà's, ndi muswè ümvwè ne, ntu nteemesha kàndeyì bufuku bwônsò." Byenzè bu ne aci cìvwa ne dipetangana ne bwena Kilistò's!

⁴² Muntu mukwàbo wàkamba ne: "Èè, mêmè's ndi mwena Àmèrikè. Bushùwà's!" Èè, aci kacyènakù ne dipetangana naaCì to, nànsa dikesè. Udi mwena Kilistò bwalu udi wa mu Bukalenge bukwàbò. Neyà bushùwà. Ne udi—udi mu Bukalenge bukwàbò, bwà kuulu.

⁴³ Mpindyewu, Samwèlè wàkenza cinyì? Cintu ànu cìmwècìmwè cìdì Nzambì mwenzè kaaba aka eci. Samwèlè kukùngwijayè Izàlèèla, kwambayè ne: "Mpindyewu, nteèlèjaayi. Ndi muswè nnùkonke cintu kampànda. Kùkaadikù musangu

nànscha wùmwè wûnkaadìku munwâmbile cintu kampàndà cîvwà kaciyi cilelèlè anyì?” Yéyè ne: “Mêmè—mêmè ndi mupròfetà wa Nzambì munkaci mwènù. Anjì ngambilaayikù musangu nànscha wùmwè wûnkaadìku munwâmbile cintu kampàndà mu Dînà dyà Mukalenge cîtù kaciyi cyenzèke.” Ki cyàkabàmbilà Samwèlè ncyôcì aci. Yéyè ne: “Ne Nzambì kàtukù munùdiishè ne munùkùbe ne mwenzè bintu byônsò ebi anyì?” Yéyè ne: “Nudi nwenza mpèkaatù pa kuteeta kwenza maalu bu matunga makwàbo.”

“Kaa . . .” mwàkambàbo.

⁴⁴ Yéyè ne: “Ndi muswè nnùkonkèku cintu kampàndà. Kacya nkààdikù munwângâtè mfrangà yènù anyì? Kacya nkààdikù munùlòmbe mulàmbù bu kàà pa luse anyì? Anyì nkààdikù munwâmbile cintu kampàndà mu Dînà dyà Mukalenge cîtù kaciyi cyenzèke anyì?”

Bôbò kwamba ne: “To. Kacya kùtukù mwangâtè mfrangà yètù to, aci ncilelèlè. Ne kacya kùtukù mutwâmbile cintu kampàndà mu Dînà dyà Mukalenge citù kaciyi cyenzèke to.”

Yéyè ne: “Nànsku ngumvwàyi! Nudi nwenza mpèkaatù pa kuteeta kwenza maalu mùdì bakwàbò bônsò.” Kàdi bàvwa bâkèba mfùmù nànscha byà munyì! Nànscha biikàle bîmpè anyì bibì, bàvwa—bàvwa baswè kukumbaja ànu mmwènenu wabò awu.

⁴⁵ Ncintu cîmwècîmwè aci cyàkenzà èkèleeyiyà mwaba ewu mene ku Efèsò, bàvwa bangâtè dilongesha dyà beena Nikàlèwù. Nènku pààkenzàbo nànsku, cyàkabàssàka buludì ku disambakaja pàmwè cimpàngaanù ne bwena Kilistò ne kafilaci bidimu cinunu ne nkàmà yitaanu byà Bikondo byà Mîdimà. Kàdi Luther pààkabàpàtulàye, bu (cipungu ciibidì) ba-Luthériens kabààkenza cintu cîmwècîmwè cyéñzèlèbo kale mu Efèsò aci to! Menemene’s.

⁴⁶ Mpindyewu, bu nwènù mwà kumònà, bitèèkedi byà myêndù abi kabìvwa bitèèkùlbwe menemene mùshindù *ewu* to. Bìvwa bìbanga kwinshi *nùnku* kàdi bìbànda. Èè, cîvwà citàmbe kutùmbùka kule ne mwaba wùvwàYe mwimànyîne cîvwa ng’eci lwà kuulu *eku*. Ki bwena Kilistò bùvvà bùpàtakajiibwa kakesè kakesè pàvvàbu bwènda bùùmuka kuvvàYe mwimànyîne mu mmwènekelu wa nkùrusè amu, mutùdi bafwànyîne kuMumònà mu nshapità mwi4; mu mmwènekelu wa nkùrusè mùshindù *ewu*. Nènku *eci* ncyanza Cyèndè cyà dyàbalùme, *cyàcyà* cîvwa ncyanza Cyèndè cyà dyàbakàjì. Mpindyewu, *apa* mene, Yéyè ùvwa ne *cyanza* Cyèndè citèka pa *ewu* èkèleeyiyà ne pa *wàwa* èkèleeyiyà. Uvwa byônsò bìbidì Alpha ne Omega ne, mu bushùwà bwà bwalu, byônsò bìvwa munkaci mwà bìbidì abi, maleeta makwàbò ônsò awu. Kàdi Yéyè wàkamba ànu mu mùshindù musungùlùke ne: “Alpha ne Omega.” Ùvwa ne mwanzankòngòlò kumutù Kwèndè, cîvwa ciikàle cipungidi Cyèndè aci.

⁴⁷ Mpindyewu, nwénù baswè kumònà, bukénkè bwà Mpenta, mwaba wàkabangàbu, bwàkapàcishiibwa kakesè kakesè. Bantu aba, Irénée, Polycarpe, bakwàbò bônsò abu bààkatwà citampì ku bujaadiki bwàbò ne mashi àbò, mu mùshindù wà ne ndekeelu wa byônsò cyàkakàma bwena Kilistò ne kubùbweja mu matùkù à matàmbe kwikala à mîdimà.

⁴⁸ Mpindyewu tàngilàayi, cikondo cyà kumpàla ku luseke lukwàbò lwà dikokò dinene adi, kùvwa kùlwa ndambù mukesè wa Bukénkè, Bukénkè bukwàbò bwàbûngì, pashìishe Bukénkè bukwàbò bwàbûngì. Mònaayi mùdìBu bùbanga kukenkesha cyàkàbìdì, bwènda bùlwa mu ditùkù adi. Nènku mpindyewu ku ndekeelu kwà *eci* cikondo, mbidyànjila kwamba kaaba aka ne cìvwa mwà kulwa ku *Laòdikìyà*, wa “civùmvù.” Mpindyewu, ncyòcì *eci*. Mòna’s, piìkalàbi ne *eci* cintu mwab’ewu cyàkabàfikishà ku *eci*, tudi bafwànyìne kuswà cyôcì aci kwinshì eku mu Mpenta bwà cinyì?

⁴⁹ Ne nudi bamanyè ne Bible mmwambè ne: “Kùvwa mwà kwikala nyama wa lwonji.” Ne twêtù tudi bamanyè ne mbuuupaapà bwà beena Loomò. Ncyà bushùwà menemene. Ne pashìishe bàvwa mwà kwenza cimfwànyì cyà nyama wa lwonji awu. Cimfwànyì ncinyì? Cintu cyenza cifwànàngànè nendè. Ne aci nnsangilu wa maèkèleeziyà, ne Mpenta ùdimù. Nekùlwé cikondo cinwìkalà anyì bàà mu bulongolodi kampàndà anyì kanùyi mwà kushààlakù balamè ciibi cyènù cikàngula to. Mpindyewu mònaayi aci ní kí ncilelèlè! S’ki bwà cinyì tudi twakulapu ne dinànukila dyônsò. Èyowà’s, mukalenge. Nwénù kanwèna mwà... Cyà cishààdile ne ku cyôcì aci, nebàteetè bwà kunùkèbelà bilumbù bibì be, mu mùshindù wà bàteeta bwà... kabààkunùlekelakù nusùmba anyì nusùmbisha to panwìkalà kanùyi ne cimanyinu cyà bulongolodi abu aci. Cidi cibùbwejamù buludì.

⁵⁰ Ànu menemene bu ditùkù adi, bààkabòòsha, bàvwa... Ngâkiimana mwaba awu mu cipalu aci; mêmè kudila mwadi bu mwânà wa mu dibòko pângààkatàngilà mwaba wùvwà balwanganyì bàà mvità abu mwà kusòmba mu cipalu cyà kale aci. Ne—ne mmôna bintu abi, ne mmanya ne bààbûngì bàà ku bânà bëètù beena Kilistò bààkadìlbwa kùdì nyama ya ntambwe ne—ne basùnsula pansi pônsò apu, ne bakàjì ne bânà bakesè ne bikwàbò. Nènku ndi ngeela meeji ne, piìkalàbi ne bônsò bààkaya mu buloba mu diitabuuja, ndikù mufwànyìne kubàlekela mpindyewu mu buloba amu anyi? To, mukalenge, mwanèètù! Nzambi, enzàku bwà ngììkalè mwimàne bwà Diitabuuja dyàkafidiibwà kùdì bansantu musangu wùmwè cyendèlèlè! Cintu cìmwècìmwè aci, nànsha nciyi munangiibwe...

⁵¹ Muntu kampàndà mmuswè misangu yônsò ànu kwamba ne: “Èè,...” Muntu kampàndà ùvwa wàmba àbìdì àdì pansi aa... Kaa! Mbambi banène bûngì kaayi mu budimi bwà bwambi

bàkaadì bambiìkìle bàmba ne: “Mwanèètù Branham, wêwè kùyi mwimànyìke aci to, bulongolodi ne bulongolodi bwônsò’s nebùbenganganè neebè.”

⁵² “Môna’s,” mûngààkambà, “kùdi Ewu wíkala kàyikù mwà kubèngangana naanyì to, ng’Ewu udi mu Dyulu awu. S’ki Yéyè ûndì mêmè mwindile.” Nwamònú anyi? Mpindyewu, mêmè ntu munangè bantu mu bulongolodi ne bulongolodi bwônsò. Bushùwà’s. Kàdi kacya nkààdikù munwâmbile cintu kampàndà cìdì Mukalenge...mu Dînà dyà Mukalenge, kacìyi cyenzèke anyi? Nwamònú anyi? Byônsò bitu byambìibwe ne byenjiìbwé mu mùshindù mujaalàme anyi? Kacya nkààdikù munùlòmbe mfrangà bu kàà pa luse anyi? Nànkú shààlaayi pambèlù pàà malongolodi! Shààlaayi badishikàmìne mu Kilistò, lekelaayi Nyumà Mwîmpè misangu yônsò ànu ùbwela ne ùpàtuka mu èkèleeyiyà.

⁵³ Cintu cìmwèpelè cìdì ne bwalu, umùshaayi kunùdì tulumbùlumbù atu. Tusùmbusumbu, ne tunjiyà tukesètukesè tûdì tunùnyùngùlùkìle bwà bânà bètù atu, ne bintu byà mùshindù awu, dinyùkùlùlaayi nubyümùshè! Kanùlekedikù muji wa bululu nànsha wùmwè wùbwela mu musùùkà wènù to. Nwénù benzè nànkú, aci necinùkunyè bu kamunguji. Cyà bushùwà. Ikalaayi balamè dinanga! Nànsha bantu bakukìne munyì, ùbànangè wêwè nànsha bìshi. Wêwè kùyi mwà kwenza nànkú to, bìdi bìkukèngela...kùdì...kwêna... kwêna mutwìbwé citampì to, ucìdi ne kaaba kadilekèlèle. Pa nànkú lwâku, alùkilà, ne ùtwishèpu citampì bìmpè menemene ne Mashi à Kilistò. Ówò neàkukezùlè ku miji yônsò yà bululu ayi. Èyowà.

⁵⁴ Mpindyewu, nwamònú’s, kàdi tudi tuteeta cyàkàbìdì. Dibènesha dyà Mpenta dyàkamata lwà ku cidimu cyà 1906, lwà ku cikondo aci. Kùdi mwambi kampànda musòmbe neetù dilòòlò edi, mpandanjila wa ku Tibet, umwe wa ku ba-...Ncyéna ncyàmba ne mbwalu ùdipù to; ndi ntèkemena ne kí mmwalùkìle kumbèlu to. ndi ngeela meeji ne ùcìdipù, yéyè nguvwa mwà kwakula neetù kakesé ndambù kumpàlà kwa mêmè kulwa. Ne muntu awu mmuvùlùke ntwàdijilu wa Mpenta. Kakùvvwakù bulongolodi nànsha bùmwè to, bantu bônsò bàvwa ne bintu bitéèkela pàmwè. Kaa, mùshindù mwinè wùdibi bipeepèle bwà kwela cidya cibì mwaba awu mene, ne mùdìbi bìmwèka bìmpè bwà mwena mamanya a mu mutù’s wè.

⁵⁵ Tàngilààyi, Izalèèlè kàvvwakù mumanyè ne pàvvwàbo biimàne ku mweelu wà mâyìaku, bëèla mbilà apu...Mpindyewu, wêwè udi wamba ne: “Ewu mùshindù wà ntèndeeluu ncintu cyà cipyacipyà.” Môna’s, s’ncyà citàmbe kwikala cyà kale cìdiku. Bushùwà’s. Nànsha mene kumpàlà kwà dyulu ne buloba kabiyi byenjiìbwé, s’bàvwa bëèla mbilà ne bâtùmbisha Nzambì. Nzambì ngudi mwambè nànkú, wàkakonka Yobò ne: “Ùvwa

penyì pàvvwà—pàvvwà mítootò yà mu dìndà yìmba pàmwè, ne bânà bàà Nzambi bëèla mbìlà yà disànska.” Aci’s nkumpàlà kwà dyulu ne buloba kufukiibwbà.

⁵⁶ Kàdi mpindyewu tàngilààyi Izàlèèlà, ùkaavwa mumònè bishìmà. Aci’s ki Mpenta wa ku cibangidilu; Izàlèèlà, Mpenta wa ditùkù adi. Mpindyewu bôbò bàkaavwa bapàtula mu Èjiipitu, Nzambi ùvwà mubàbènèshe, mubàpèèshe bimanyinu binènè byà mishindù yônsò ne maalu à kukèma, ne mubàsùngilè. Nènku pààkiimanàbo ku mwelelu wà mâyì awu aku ne bènza disangisha dyà beena Mpenta adi... S’ki cyàkenzàbo! Mpindyewu fèèlejààyi. Môsà wàkimba mu Nyumà, ne Miliyàmà kwangata dikasa ne kupwekayè lubilu ku mwelelu wà mâyì aku, wènda ùtuuta dikasa, ùja maja mu Nyumà; ki bânà bàà bakàjì bàà Izàlèèlà kumutwàbo mu nyimà, bënda bàja maja mu Nyumà. Aci cyôcì kaciyi disangisha dyà beena Mpenta to, mêmè ncitukù mwanjì kudîmònà kacya to. Kabàvvakù biìtabuuja ne—ne buloba bulaya bùvwa mu bidimu makùmi ànaayi kumpàlà kwàbò aku to. Kùvwa ànu mu ntàntà wa kilômètè mitwè ku makùmi àsambòmbò ne yìnaayi cyanàànà. Kàdi bìvwa bifwànyine kubàngata bidimu makùmi ànaayi bwà kwenda kilômètè makùmi àsambòmbò ne yìnaayi mbwalu bàvwa basungùle cintu cyà cibi. Bààkasungula bwà kwikalala ne mikensi pamutù pàà kulekela Nyumà Mwímpè ùbàlombola, Dikunji dyà Kapyà dyàkaya naabò too ne ku ndekeelu dyènda dibàlombola. Bàvwa baswè kwikalakù ne cintu kampàndà cyà bènza bôbò biinè; bàvwa baswè kwikalala ne bansaserdòsè kampàndà, ne bantu kampàndà bàà myânzù mitùmbùke, ne ndambù wa tèòlòjì uvwabò mwà kukòkelanganapù, pamutù pàà kuyabò ànu kumpàlà cyanàànà ne kulekela Nyumà Mwímpè ùbàlombola. Bàvwa mu Nyumà; Nzambi ùkaavwa mulongòlôle bintu byônsò, kàdi bìvwa bikèngela bwà kwikalabò ne cintu kampàndà cyà babwejaMù.

⁵⁷ Ànu mùdìbi cyàkàbìdi bwà disopakaja dyà mamiiniu. Lekèlaayi ngombe kwèndè kwà tâlâlâà. Lekèlaayi kabalu kwàkù kwà tâlâlâà. Lekèlaayi byàkudyà kwàbì kwà tâlâlâà. Bôbò... Maalu à mamanya mmambè, mu cibejibeji cyà *Reader's Digest*, mu kaabwalu kèndè amu ne, bôbò ànu batùngùnùke ne kusopakaja byàkudyà, ne bantu pààbò bàbìdyà... Bu mùdì nzòolo, bâdi bàngata nzòolo udi mukwàte ne byà luse awu too ne pàdiye ùshààla kaciyi ne mapwâpwà anyì ne mikòlò to. Ne yéyè mwelè diyi, ùdi ùshààla mulâàle bu mufwè, miikâle mwà kushààla ne mwoyi ànu cidimu címwè cyanàànà. Ne munyìinyì mmutekètàngànè mu mùshindù wà kùyikù mwà kuwùdya to. Ne bantu bâdi bàwùdfa, ùdi ùbanyangakaja. Ncyà bushùwà.

⁵⁸ Nudi bamanyè’s, disangila dyà mulùmè ne mulùmè ndivulàngane ne byà pa lukàmà bitwè ku makùmi ànaayi mu États-Unis, kupîte cidimu cishààla. Ne nudikù bamanyè ne maalu àà mamanya àdi àmba ne bakajì bàkaadi batàmba

kudyundila ku makaaya ne bâkèèpela mu cifùka, kâdì balùme bâkèèpela ku makaaya ne bâdyundila mu cifùka anyì? Nudi nudya dimiinu dinyangakaja, nudi nudya bintu binyangakaja. Mubidi wèbè wuvwa mwenza bwà kwikalawù wùdya bintu byà mu bufùki. Kâdì cidìci cyènza ncinyì? Cìdi cishintulula mene ne musùlù wà cifükilu wà balùmè ne bakajì, mu mùshindù wa ne Hollywood, nànsha mene bukalenge bwètù ne byônsò, biakaadi byûle tèntè ne bantu banyangakaja. Cìdiye wènza ncinyì? Bâdì bâditwàdilacì pa bôbò biine ku mucì wàbò sungasunga wà dimanya awu, badishebeya bôbò biine.

⁵⁹ Alùkìlaayi ku cibangidilu! Lekèlaayi bufùki kwàbù kwà tâlalàà. Lekèlaayi Nzambì Kwèndè kwà tâlalàà. Lamàayi Èkèleeyiyà mu Nyumà Mwîmpè; ne ndààyi kule ne bêèpiskòpò ne baapaapà bônsò bâdì ne malongesha à mìshindù yônsò aba. Alùkìlaayi mwaba wutùvwà babangile. Alùkìlaayi. Bu Yesù mwà kulwa dilòòlò edi, wêwè mufwànyìne kwamba ne: “Mêmè ndi Méthodiste.”

Yêyè ùvwa mufwànyìne kwamba ne: “Kabìvwa nànku ku cibangidilu to!”

“Mêmè ndi Presbytérian.”

“Kabìvwa nànku ku cibangidilu to!” Cìvwà ku cibangidilu ncinyì? Dilabula dyà Mpenta dyà dibàtiiza dyà Nyumà Mwîmpè. Ki mwàkabangàCi.

⁶⁰ Kâdì, nwamònou’s, bìvwa bìkèngela bwà twêtù kucìnyangakaja. Kaa, s’mbilenga bilayà. Bushùwà’s. Kaèkèleeyiyà kakesè kâdì kiimàne pààpa kàja maja kâka, ne kèèla mbilà; ne mu mùsèèsù mwàmwa, bantu bàbààsa mabwe, bàbèèlulwila, ne bintu byônsò byà mùshindù awu abi. Abi kí mbilenga byà menemene to. “Kâdì mpindyewu tudi ne musambu munènè wà Tumbishàayi Mfùmù, ne Diiataba dyà Bâpostòlò, ne, kaa, mapòlomè à Docteur mu Ph.D., L.L. ne L.D. misangu yìbìdì, Kampànda bu mpaasàtà wetù.” Kâdì kupàtuka kwamba ne: “Aameen,” bu kânà kàà ngombe kiikàle ne tukùlakàjì, ne bâtungunuka mùshindù awu, bintu byônsò byà mùshindù awu abi.

⁶¹ Nwamfwìlaayikù luse, ncìvwa—ncìvwa ne meeji a kwamba nànku to. Nwamfwìlaayikù luse, ncìvwa ne meeji a kwamba aci mùshindù awu to. Nwamònou anyì? Ncìvwa ne meeji a kwamba nànku to. Aci kí ncikùmbànè bwà musadidi wa Nzambì to.

⁶² Kâdì, tàngilààyi, bônsò bwàbò, ndi... ncimvwilè pààcì ànu mu meeji cyanàànà, nwamònou’s. Kâdì wimana wamba bintu byônsò bishiìlèshiìlàngàne mùshindù awu, kubyènza kumpàlà kwà... nudi bamanye’s, wamba ne: “Mpindyewu, to, kwêna wamba aci mu mùshindù mujaalàme to. ‘Aameen.’” Mêmè ntu munangè disangisha dímpè dyà cyena Mpenta, dyà kale mudì bukolè bwà Nzambì bwìcikila, ne nwénù biikàle ànu

nutuuta mikòbolo nwela mbìlà nutùmbisha Nzambì, nupìcila mu cikondo cyà dicyònkomoka. Ki mùshindù ngwôwò awu; Nyumà mmukwàtè bantu. Kàdi tudi... Kùyi mwà kuumvwakù kàbìdì “Amen!” bipeepèlè nùnku to, cìdi “Aameen.” Kàdi, ki kutwàyà kafika nkŵokò aku, nudi numònà’s. Malongolodi aa mmakàyàbàle, maditàmbishi...

⁶³ Mpindyewu bàpo-... Kùvvwakù cipròfetà pa bwalu abu anyì? Nudi bavùlùke cipròfetà cyà Pôlò makèèlèlà dilòòlò awu anyì? “Ndi mumanyè ne paanyimà pàà diya dyànyì, mbwà yà diitu yà lwonji neyibwelè munkaci mwènù, ne bantu bàà cipidì cyénù sungasunga, cyénù... ànu mu èkèleeziyà wenù mene amu (Èkèleeziyà wa Kàtòlikè wa cyena Loomò, mwikâle ûlwà) nebàjuukè munkaci mwènù ne nebàkokè bayiidi paanyimà pààbò.” Nènku mbwà yà diitu yà Pôlò ayi, tudi tujandula ne, nyàkalwà beena Nikàlàwù abu.

⁶⁴ Tèèlejààyi cyàkàbìdì Nyumà wàkwila ku mupròfetà ne: “Mu matükù à ndekeelu bikondo byà njiwù nebìlwe, bwalu bantu nebìikalè badìnangi bôbò biinè, (‘Mêmè’s ndi Docteur Kampànda, wéwè kùngambìdì bwalu pa Cyôci aci to, mpindyewu. Ndi muswè bwà ùmanyè ne mêmè ndi Presbytérian. Alèluuyàh!’ Anyì ne: ‘Ndi mwena Mpenta.’).” Ciinè aci cìdi ne dishììlangana kaayì, wéwè kùyi mwena Mpenta ku ngiikàdilù? Dilabula dyàci, nwamònù’s. Èyowà’s, mukalenge. “Mêmè ntu wa mu Assemblées.” “Ntu wa mu Église de Dieu.” Èè aci... aci cìdi ne dishììlangana kaayì bwà Nzambì? Bikèngela wìkalè wa mu Bukalenge bwà kuulu kwàka, nwamònù’s. Ncyà bushùwà.

⁶⁵ Mpindyewu, bu—bu nwènù mwà kumònà, bu... bintu byônsò ebi bìdi ànu cìnkùtunkùtù-mùyòmbelè cyà—cyà masandi à mulùme ne mulùme. Mpindyewu, nCyambè ne: “Bàvwa mwà kwikala bapapè mitu, badìbàndishi, banangi bàà bisankasanka kutàmba kwikala banangi bàà Nzambì.” Kàà, kabèèna mwà kuya mu èkèleeziyà mu dyàlumingu dilòòlò to pàdìku ndongamu kampànda mwîmpè wa ku télèviziyyô. Kaa, ekèlekèle! Bàdi misangu yônsò... Nànsha mene èkèleeziyà yìdi ne tusùmbù twà ndundu, ne madyà à nsupù, ne manayì à ndundu wa mipànji, ne, “banangi bàà bisànkasanka kutàmba kwikala banangi bàà Nzambì, bashipi bà bipungidi, basòngwedyanganyi, kabàyi ne kudìkànda, ne badyombodi bàà aba bàdi bîmpè.” *Aba badyombola bâba*, nwamònù’s. *Aba badyombola bâba*, bàbàfùdisha mupùùyà wà munda. Badyombodi bàà aba bàdi bîmpè.

⁶⁶ Kaa, wéwè udi wamba ne: “Abu’s mba-Communistes, mwanèètù.” Kaa, to. To, to.

⁶⁷ “Bapapè mitù, badìbàndishi, banangi bàà bisànkasanka kutàmba kwikala banangi bàà Nzambì, bashipi bà bipungidi, basòngwedyanganyi, babûle kudikanda, badyombodi bàà aba bàdi bîmpè, biikâle ne cimwènekelu...” Dilabula dyà cyena-

màngumba, nwamònù's. "Biikàle ne cimwènekelu cyà difwànà dyà Nzambì, kàdi biikàle bàvila Bukolè bwàdì."

⁶⁸ Wêwê uvwakù mu fwànyìne kwikalà cinyì mu ditùkù edi? Nwamònù's: "Biikàle ne cimwènekelu cyà difwànà dyà Nzambì." Mwikàle uya mu èkèleeziyà ànu ne kaneemu kakolè bwà ntendeleelu ne mwèbè mwônsò mu dyàlumingu, kàdi uvwàla tûpùtulù mu dyàlumingu mu mapingaja, ukòsa mashindà mu bulà ne unwà maalà à Oertel 92 pambèlu apu. Ne mpaasàtà ùpàtuka pambèlu ûkanwà mucì wà mfwankà wàlukila, nudi bamanyè's. "Biikàle ne cimwènekelu cyà difwànà dyà Nzambì!"

⁶⁹ "Èè, mpaasàtà, bâdi ne èkèleeziyà kuntu kwàka, bàngambilà ne inábànzà kampànda mmwondòpìibwe ditùkù adi ku kàn- . . ."

"Hmm. Hmm. Macimbu's wè! Matùkù a bishìmà's àkaadi mamanè kupita."

⁷⁰ "Èè, nudi bamanyè mùdì bwalu anyì? Mvwa—mvwa—mvwa tuyè ku kaèkèleeziyà kakesè kampànda dilòòlò adi, kaacitanda kakesè kàka lwà mu disangu mwàmwa, ne kùvvwa muntu mujuukè, wàkula cintu kampànda, ûkukumin- . . ."

"Kaa, munanga wanyì, kwíkadikù mukalamàte ku kàà mùshindù wàwa to. Yàya's mbwa mipaale's. Ekèlekèle! Kwíkadikù ukajímija dîbà ne byà nàka to. Bâba mbansantu babùnguluki bâà mu malaba. Kùdídìngikù . . ."

⁷¹ "Biikàle ne cimwènekelu cyà difwànà dyà Nzambì kàdi biikàle bàvila bukolè bwàdì, epùkà bâà nànku awu abu. Bwalu aba mbàà mùshindù wà bâdì bâya ku nzùbu ne ku nzùbu ne bâlombola bakàjì bakùtákàne bâdì bapàmbula kùdì nkùkà yà mishindù yônsò, kabàyikù mwà kuyiila anyì kabàyikù mwà kufika ku dimanya dyà Bulelèlà to." Aci ncyà bushùwà menemene. Ki bwalu abu's, kasùmbù kàà bainábànzà, aka kasùmbù, kàka nàka. Èkèleeziyà mukwàte ne byà luse ukààdi ne tusùmbù bûngì cyanàànà mu mùshindù wà kabàciyikù nànsha mwà kuyiisha kàbidì Èvànjeellyò to. Mpaasàtà ùdi mwà kwikalà ànu ne tusunsa makùmi àbìdì, ne dîbà adi bìkèngela àkulè pa cintu kampànda cikwàbò. Nwamònù anyì? Yéyè kàyi mwenzè nànku to, kasùmbù kàà balami nekàtwilanganè nendè. Èyowà's, mukalenge.

⁷² Kaa, mwanèètù, bìkèngela mpaasàtà mwîmpè énzè cinyì leelù ewu? Énzè yéyè ànu ne mwèndè mwônsò bwà kujuukayè ne kukòsa matàmbà aya kwônsò kudiwù maswè aku, ne kulekela bipàtù bìkamacila kwônsô kwàkamacilàbi aku; ne kubiìmansha ànu kwàka. Kwàjiki. Èyowà's, mukalenge. Ncyà bushùwà. Kwè—kwèdikù muntu nànsha umwe paanyimà to, yiishà wêwê ànu Dîyì ne shààla ànu naaDì, tungunukà ànu ne kusùmìnyinapù. Bòbò bakwelè mu bùlokò, ùDiyiishe mu bùlokò amu. Bòbò bakwelè nî mpenyì pakwàbò, yiishà kwônsò kûyaayà aku;

tungunukà wêwè ànu ne kuya, wenda uyiisha. Ncyà bushùwà. Mpindyewu, ki cidì cyenzèke ncyôcì aci. Nwamònù's, bôbò bàdi bacìbwikidi ja mukana.

⁷³ Mpindyewu tukààdi tufika ku—ku Cikondo cyà Seemùnà. Mvensà wa 8:

*...kùdì mwanjèlo wa èkèleeziyà wa Seemùnà funda
ne: Ebi mbintu bìdì wa kumpàlà ne wa ndekeelu wàmба,
ewu uvwa mufwè, ne udi ne mwoyi;*

⁷⁴ Ndi muswè bwà numònè ne musangu wônsò wùdì Ye ùDìteeja kùdì cikondo cyà èkèleeziyà, Yéyè údi üleeja patòòke cintu kampàndà cyà Bunzambì Bwèndè. Ki cintu cyà kumpàlà cìdì Ye ùteeta bwà kumanyisha èkèleeziyà, ne, ki Bunzambì Bwèndè. Yéyè údi Nzambì! Nudi numònà cilumbù cinène mwaba ewu cìvvà Irénée ne bakwàbò biikàle bàkòkelangana aci anyì? Bàvva bâeteeta kwamba ne Nzambì údi mu bibwàshìbwàshì bìsàtù, ne n' Nzambì mu bapersonà bàsàtù, ne Nzambì údi mu cikampàndà. Yéyè ne: "Cintu bu nànkú kacitukù to! Mmyânzù yà Kampàndà umwèpelè, ne mwinè awu n' Nzambì wa Bukolè bwônsò." Ncyà bushùwà. Pa nànkú kwêna... bôbò bâtu misangu yônsò ànu ne cyôcì aci. Nènku Nzambì mwaba ewu ku cibangidilu nyewù ùDìteejila ku bùmwè bwà ku Bunzambì Bwèndè—Bwèndè. Nudi numònà ne Údi ùDìleeja, dyàmbedi mwaba ewu ne: "Ndi Ewu uvwaku, udiku, ne wâlwa awu. Ne Mêmè ndi wa Bukolè bwônsò." Ki Yéyè ewu ùbunga ne Cikondo cyà Seemùnà mpindyewu.

⁷⁵ Mpindyewu Mutèèlejaayi: "Ndi . . ."

*...kùdì mwanjèlo wa èkèleeziyà wa Seemùnà (Ne
tudi twitàbuua ne awu ny'Irénee.) funda ne: Ebi mbintu
bìdì wa kumpàlà ne wa ndekeelu wàmба, . . .*

Nwamònù anyì? MuDìleejè ne: "Ndi Nzambì, mpindyewu, wa cikondo cyà èkèleeziyà eci. Ncyêna muswè byà nzambi yìnaayi anyì yitaanu mishìlàngànè mwab'ewu to. Mêmè—Mêmè ki Nzambì. Nwamònù's, ki mùdibi nànkú."

. . . uvwa mufwè, kâdi mwikàle ne mwoyi; (Amen!)

⁷⁶ Mpindyewu, aci ndi—ndiditèèja. Mpindyewu—mpindyewu Seemùnà mbwena kwamba ne "bululu," ne cìdì cífùmina ku mwakù muulà—muulà. Nènku èkèleeziyà wa—wa kumpàl—èkèleeziyà wa kumpàla, ne... uvwa mujimìje dinanga dyèndè dyà kumpàla, èkèleeziyà wa Efèsò. Ne èkèleeziyà ewu uvwa mubangè kupeta "muji wa bululu" mujuukè munda mwàbò bwalu èkèleeziyà ewu, èkèleeziyà wa munène, citùpà cinène (ciibûngì cyà kùdibo, misangu yônsò) uvwa ùlwishangana ne Nyumà Mwímpè uvwa ukòòkesha mu èkèleeziyà awu, nènku bàvva bàswa kukòòkesha, bôbò biinè. Bâvva baswè kujuula bwakwidi kampàndà, basvwè kwenza maalu mùvwà bantu bàà mu Dipungila Dikùlkulu bènza amu. Bâvva bàkèba baakwidì. Ki bôbò... Piìkalàbi ne nzambì yà cimpàngaanù, kale wàwa,

kùvvwàbo bakùdìmwìne mucìma aku, bàvwa ne baakwidi ne bikwàbò byà...byà Jupiter, ne baakwidi bàà Venus, ne bikwàbò; bôbò—bôbò—bôbò mbaswè kubwejamu cintu cìmwècìmwè aci bwà kutèèka bantu *aba*. Nwamònù's, cintu cyônsò mu kaabujimà mbumpàngaanu ànu kwinè kwônsò aku. Bampàngaanù bônsò bâtu ne baakwidi abu ne bintu byà mùshindù awu. Kàdi—kadi Èkèleeziyà wa Nzambì udi ne mwoyi, mmwenyi kùdibi. Kilistò ki wetù Mwakwidi, Mwakwidi wetù Munène. Twêtù tudi kàbìdì ne Mwakwidi Munène, mèèsà kutùdì tudyà.

⁷⁷ Mpindyewu, èkèleeziyà ewu ùkaavwa mubangè kutòlwesha “muji wà bululu.” Bwà cinyì? Ùvwa ne bululu bwà kulwisha aba bàdì baswè kutungunuka ne Nyumà Mwímpè. Dinanga dikaavwa dijímìne, ne bàvwa bâteeta kudishintakaja ku twítabààyì ne màngumba, bàseesuka ku bulombodi bwà Nyumà Mwímpè. Elàayibì meeji ku bwalu abu! Ki bwà cinyì bu—bu—bululu bùwwa munda mwàbò. Éyo.

⁷⁸ Mpindyewu, èkèleeziyà wa kumpàla, eci...bululu bwàkabanga kudifindamù. Èkèleeziyà mwibidì, bukwàbù ndambù. Nenku, ndekeelu wa byônsò, bwàkadìfindamù bwalu bàvwa “bènza èkèleeziyà mutàmbe bwímpè”; bàvwa bêèla meeji ne ki cìvwàbo bènza. Ànu mwaba ewu bàvwa ne cintu kampàndà cyà kuneemekiibwa, beena Loomò bàà banènè bàvvà mwà kubwelamù abu's. Bwà cinyì? Bâvwa ne paapà, bàvwa ne—bàvwa ne bantu banènè, ne baakardinalè, ne bikwàbò. Bâvwa bàvwàla bilenga. Bâàkaya kule ku mutooyi wônsò ne byônsò bìvwàbo naabi; bapùwe bikolè. Bileeja ne bàvwa bâpùnga ne lufù. Uh-huh. Uh-huh. Bâvwa bâpùnga ne lufù. Ki bôbò kupeta banènè bàà luumu ne kwenzabò cisùmbù citàmbe bwímpè. Cintu cyà kumpàla mwaba ewu, bàvwa ne cintu cyônsò mu kaabujimà mu dingumba dinène dyà cyena-ntèndeelù, èkèleeziyà wa Loomò wa Buloba bujimà awu, Èkèleeziyà wa Kàtòlikè wa cyena-Loomò mu Cikondo cyà Mídimà. Èè, dîbà adi, bàvwa ne bantu bàà myânzù mitùmbùke, ne bàvwa ne cipidi.

⁷⁹ Kaa, bìvwa bilenga byà dikèma kutàmba mùvwàbo kale wàwa biìmanyina mu mùsèèsù, “ne bikèngela bënda bavwàle bisèbà byà mìkòòkò bu bisèbà byà mbùji, ne banyènga bintu byônsò, ne bàbàkosolola ne mwelè wà mabaya, ne—ne basekiìbwé, ne bàbèélulwila,” ne mwàkambà Pôlò mu Ebèlù nshapità wa 11.

⁸⁰ Môna's, èkèleeziyà munène, mwalàbàle, wa bantu bavwàle mìzàbì milenga, ne bìvùngà bilenga ewu, ne—ne bintu bikwàbò byônsò bìdìbo bàvwàla mùshindù awu ebi. Bushùwà's, bìvwa bìmwèka byà kaneemu ne: “Taatù, Révérend, Docteur, Taatù Kampànda.” Kàa, ekèlekèle! Bâvwa bafwànyine kuleeja bintu bya “tuyaayi tukamona,” mwaba awu.

⁸¹ Kàdi, nudi numònà's, cìvwa ncintu cyà cisopakaja. Cisopakaja! Nwamònù's, kacìvwa ne Mwoyi nànsha mukesè

munda mwàcì to. Ne kabèèna mwà kwalukila cyàkàbìdì to, ki bwà cinyì kabèèna bàjuukakù to. Ditàbuluja dyà ba-Luthériens kadìtukù dijuukè cyàkàbìdì to. Ditàbuluja dyà Wesley kadìtukù dijuukè cyàkàbìdì to. Nànscha ditàbuluja dyà beena Mpenta kadyàkujuukakù cyàkàbìdì to. Bwà cinyì? Bwalu nudi badìshipè. Nudi nudisopakaja ne maalu à pa buloba, ne mmwènenu yà beena Nikàlàwù, kanùyikù nulekela Nyumà Mwîmpè wàngata njila Wendè to. Ncyà bushùwà. Nudi nusopakaja èkèleeziyà, ne kêna mwà kulelangana yéyè mwinè cyàkàbìdì to. Panùdi nusopakaja, nudi nupeta ba-Méthodistes bakwàbò bààbûngì; ba-Baptistes badìsopakaja, bàpetà bakwàbò ba-Baptistes bààbûngì; Beena Kàtòlikè bàdisopakaja, bàpetà bakwàbò beena Kàtòlikè bààbûngì; nudi nupeta cintu cìmwècìmwè ànu cinùdì nuumusha cizubu aci. Kàdi lekèlaayi nnwàmbilèku cintu kampànda; pàdì Nyumà Mwîmpè wàlukila, Ùdi ùtwàla dilediibwa *dipyadipyà* ne Mwoyi *mupyamùpyà*; dikùdimuna dyà mucimà. Dibàtiiza dyà Nyumà; dìdi dyàluja cyàkàbìdì Èkèleeziyà ku yéyè mwinè, dyàluja cyàkàbìdì Mwoyi munda mwèndè amu.

⁸² Ditalà disopakaja kadyèna ne mwoyi munda mwàdì to. Mwoyi mwinè wùdìku awu, wùdi ànu munyangakaja. Mpindyewu, tudi twangata aci mu Cikondo cyà Mìdimà aci ne: “Kakesè kaùdì naakù aku, shààla mukàkwàte,” mwàkambà Ye. Bàkaavwa bakàkàme kwônsò. Mpindyewu, kàdi kakààkuvulanganakù cyàkàbìdì to. Mpindyewu, kùdì . . .

⁸³ Kàdi Mubidi wà Yesù Kilistò kí—kí mbulongolodi kampàndà nànscha. Mubidi wà Yesù Kilistò m’Mubidi musokòmè, m’Mubidi wà . . . mu Bukalenge bùdì Bukalenge bwà nyumà bùdì butèèkiùbwé pa buloba kùdì Yesù Kilistò mwikàle Mfùmù wa bwôbù Bukalenge ebu, Mwakwidi Munène bwà kulàmbula milàmbù bwà beena lwendo bàà mu Bukalenge ebu. Yéyè m’Mupròfetà (Diyì adi) udi uyiisha Bulelèlà ne utwàla Bukénkè bwà Nzambì mu Bukalenge ebu; ne Yéyè ùdi byônsò Mupròfetà, Mwakwidi, ne Mfùmù, mu bwinè Bukalenge ebu. Kàdi tudi tubwela mu Bukalenge ebu bishi? ku dìngumba anyì? ku mukàndà mufundilangana anyì? ku dilabulangana dyà ku cyanza anyì? Kàdi “ku Nyumà umwe nkutùdì bônsò babàtiijìbwé mu Mubidi wùmwè” wùdi Mubidi musokòmè wà Yesù Kilistò, ne twêtù tudi babàtiijìbwemù, kabiyi ku mâyì to, kabiyi ku dimyaminyiibwa dyà mâyì to, kabiyi ku dipongolodiibwa dyà mâyì to, kakùyi ku dibàtiiza dyà mâyì dyà mushindù kanà wônsò to, kàdi “ku Nyumà umwe, Nyumà Mwîmpè, nkutùdì bônsò babàtiijìbwé mu Mubidi wùmwè,” Kolintò wa Kumpàla 12. Èyo, tudi babàtiijìbwé mu Mubidi ewu ku Nyumà umwe, Nyumà Mwîmpè, dìbà adi katwèna bàà ku cintu nànscha cìmwè to pa kuumusha Kilistò. Wewè udi wa Kilistò. M’Bukalenge busokòmè bwà Nzambì bùdì bulongolola,

bwà twêtù kubwelaMù ku dibàtiiza dyà Nyumà Mwîmpè. Mêmè ndi munangè Aci! Hmm!

Kùdi bantu pàmwè ne myaba yônsò,
Beena myoyi yìlákuka yônsò kapyà
Ne Kapyà kààkapònà dyà Mpenta aku,
Kààkabàkezulà ne kubàtòòkesha aku;
Kaa, nkaKàlákuka mpindyewu mu mwoyi
wànyì,

Kaa, butùmbi kùdi Dînà Dyèndè!
Ndi ne disànska be mûndì mwà kwamba ne ndi
umwe wabò.

Ndi umwe wabò, ndi umwe wabò,
Ndi ne disànska be mûndì mwà kwamba ne ndi
umwe wabò; (Àlèluuyàh!)

Umwe wabò, ndi umwe wabò,
Mpindyewu ndi ne disànska be mûndì mwà
kwamba ne ndi umwe wabò.

Nànscha mùdì bantu aba kabàyi mwà kwikala
balonge, (ne màpòlomè à D.D.D. Ph.D.
Nwamònù's.)...kabàyi mwà mwà kwikala
balonge,

Anyì kuditàmbisha bwà luumù lwà pa buloba,
Mbapetè bônsò Mpenta wabò,

Babàtiijiìbwe mu Dînà dyà Yesù;

Ne bàdi bàmbilangana mpindyewu, ne kule ne
kumpengà ne,

Bukolè Bwèndè bùcidi ànu bùmwèbùmwè abu,
Ndi ne disànska be mûndì mwà kwamba ne ndi
umwe wabò.

Wêwè kwêna ne disànska anyì? Èyowà's, mukalenge. Ànu
umwe wabò. Kwàjikì.

⁸⁴ Ndi mvùluka pâmvwà mpicila mu Memphis, inâbànzà
mukesè, mukùlumpè wa bafilke awu ne mutù wèndè mweyemeja
mwaba awu. Yéyè kwamba ne: “Wetwàwu mu dîndà emu,
mpaasàtà.”

Mêmè ne: “Wâmanyì bishi ne ndi mpaasàtà?”

Yéyè ne: “Mukalenge ngudi mungambile ne: ‘Mpaasàtà
Wendè nya’ wènda ùpweka ne mùsèèsù, mwasè cifulu
cifiikùlùke, mwambùle mushèètè wà bilàmbà.’” Yéyè ne: “Mêmè
kumanya ne ùvwa ngwêwè pângààkumònù ulwa apu.” Nwamònù
anyì? Kaa, yéyè's ùvwa umwe wabò. Ncyà bushùwà! Kaa,
mùshindù mwinè wùdì Nzambì mwîmpè's wè!

⁸⁵ Mpindyewu ndi ngeela meeji ne cintu kampànda...
[Mwanètù Branham ùdi ùbala kabèjì kàdibo
bamupèèsha—Muf.] “Mwânà mukesè wa bakàjì unùvwà
basambidile awu—awu, mu dyàlumingu dilòòlò, wa mu Bedford

awu, ùdi ne cyà kwikalà mufùme ku difwà. Eci kacyèna mwà . . . Bu nwénù mwà kuswà sambilaayikù.” Mwânà mukesè wa bakàjì utùvwà . . . uvwabò basambìdile mwab’ewu mu dyàlumingu dilòòlò, wa ku Bedford awu, “wäfùmu—wäfùmu ku difwà,” mùdibo bambè. Twënzààyi disambila:

⁸⁶ Mukalenge Yesù, ndi ndòmba mu müşhindù kampànda anyì kansanga, Mukalenge, masambila ètù àfikèku bwà mwânà awu. Nyewù tu Kulambùla kaacintu kakesè aku, Nzambi Taatù wetù. Ne tudi twelakù meeji bwà bantu bàvvà kaaba aka bàsambila ne bâlòmba disambila bwà mwânà mukesè wa bakàjì awu. Ëyì Nzambi Taatù, ndi ndòmba bwà—bwà ne mulubù ewu kawìkadikù nànku to, Taatù; katwèna bamanyè to, kàdi ndi ndòmba bwà Wikalèku ne luse ne ûfilèku dikàndà ne ùlekelèku mwânà mukesè ewu àjuukè ne ikalè ne mwoyi bwà butùmbì bwà Nzambi. Mu Dînà dyà Yesù Kilistò mmutùdi tulòmba nùnku. Amen. Mukalenge Yesù àsakidilèku mabènesha Èndè.

⁸⁷ Mpindyewu, èkèleeziyà kampànda. Mpindyewu, dînà dyà èkèleeziyà ndiswìkàkàne ne ngiikàdilù wendè. Nudi bavùlùke ne *Seemùnà* mbwena kwamba ne “cyà bululu anyì”? Nènku nudi numòna yônsò wa èkèleeziyà ayi mpindyewu, dînà dyà èkèleeziyà ndìdì ne dipetangana ne ngiikàdilù wa èkèleeziyà awu. Ndi mufwànyine kwambakù cintu kampànda mwab’ewu; kàdi mbîmpè bwà ncyàmbi to, bwalu nudi bafwànyinè kungumvwa bibì. Nwamònù anyì?

⁸⁸ Dînà dyèbè adi, dìdi dyàmba bwalu. Udi mufwànyinè kupanga kucimanya, kàdi didi dyàmba bwalu. Kaa, èyowà’s. Wéwè udi wamba mpindyewu ne: “Abi’s ndilonga dyà nombà’s.” To, kí ndyôdì to. Pààkalediibwà Yakòbò bààkamwinyika ne *Yakòbò* civwà cyumvwija ne “munyèngyanganyi wa myaba;” kàdi pààkalwanganaye mvità ne Mwanjèlo awu, Nzambi wàkamushintulula dînà dyèndè kulwadi *Izàlèèlè*, “mwânà wa mfumù.” Ncyà bushuwà anyì? Shawùlà ùvwa “Shawùlà wa ku Taashìshì,” muntu wa lwonji; kàdi, pààkalwàye kùdì Yesù, wàkabiìkidiibwa ne “Pôlò.” Dînà dyà Simonà dìvwa “Simonà”; kàdi pààkalwàye kùdì Yesù, wàkabiìkidiibwa ne Peetèlò, “kaadibwe kakesè.” Kaa, èyowà’s, mukalenge. Kùdì . . . Dînà dyèbè adi ndiswìkakaja ku cyûdì . . . Dìdi ne didiléeja kampànda pa ngiikàdilù webé.

⁸⁹ Ne èkèleeziyà ewu uvwa ùbìikidiibwa ne n’*Seemùnà* bwalu ùvwa ùpunga ne lufù. *Seemùnà* mbwena kwamba ne “bululu.” Mu ngaakwilù mukwàbò, muji wà bululu wùvvwa wùpàtuka mwikàle wùmupàtakaja mweyelu, yéyè ùvwa mu njiila wa kupàtuka mutàngile ku muulà. Aci ki cítùbo bâlaaba naaci mibidi maanyì, muulà, nwamònù’s. Ciwa mmuulà, musenga wà kamonya, bu bwanga bwà mafutà. Bâtu bâkwàta mudimu ne muulà bwà—bwà kulaaba bitàlù maanyì paanyimà pàà

bamanè kubyèla bwanga bwà dibènga kubola, ne bikwàbò. Muswìkàkàne ne lufù, ne èkèleeziyà awu ùvwa ùpunga ne lufù.

⁹⁰ Nènku, kaa, kanwènaayikù mwà kumònà, leelù ewu, balundà bàanyì, nkawaka munène wa beena Mpenta uvwakù cyà bushùwà ne Mwoyi kùkaadi ndambù wa bidimu awu, kanwènaayikù mwà kumònà ne ùkaadi munkaci mwà kulaabiibwa mpindyewu ne muulà anyì? Nwamònù anyì? Bwanga bwà màfutà bùmwèbùmwè bùvvà mu èkèleeziyà ewu mbupwekè kwinshì eku bwikàle bùlaaba udi kwinshì eku ewu; munkaci mwà kujima bwalu bàdi munkaci mwà kwalukila ku mikùsù yà ntèndeelu, ne bùùmusha mùzàbì wàbò mutòòke awu, bansantu's. Bantu bàà bakesè bààkiimanà kwàka, ne Nyumà Mwímpè mushùwashùwàlè abu, bààkaakula mu myakulu, ne bààkamwènesha Nzambì. Nènku, mwanèètù, bôbò bàvwa ne meeji matòòke ne, “ne mwàbò mwônsò.” Bàvwa—bàvwa kakuyì mpatà to bashùwashùwàlè, mu mùshindù wà wêwè mufwànyine kubèyemena mwaba kanà wônsò. Patùdì twakulangana apa kwêna umanya cyà dyeyemena ne wa kweyemena mwinè to. Nwamònù anyì? Kûdì cintu kampànda cyenzèke. Cintu kampànda ncyenzèke. Ncinyì aci? Bàdi munkaci mwà kulaabiibwa muulà, wà bululu. Dijuuka's. Umwe . . .

⁹¹ Cìvwà cibùkèbe ncinyì? Umwe ùbwela, kùvwa è—èkèleeziyà ùbìikidiibwa, wa kumpàla awu, cìvwa Nsangilu wa Bônsò. Pashiìshe kucibìkilabò ne Assemblées de Dieu. Mu Assemblées de Dieu kupàtukamù Église de Dieu. Mu Église de Dieu, pashiìshe kubangabo kutàngila dyàmwàmwa, bàmba ne: “Nwénù nudi Assemblées.” Mukwàbò ne: “Nwénù nudi Église de Dieu.” Pashiìshe mu aci kupàtukamù Église Pentecôtiste de Dieu Unie, mu cilumbù cyà bàkòkangana's. Ki pashiìshe, katancì aka, pamutù pàà kwitaba Bukènkè ne kwendelaMu, mònà's, bàkaavwa badyéñzè bulongolodi mu mùshindù wà kabàyikù bafwànyine kwitaba Bukènkè to.

⁹² Mpindyewu, pààkatwàdiibwà dibàtiiza dyà—dyà mu Dînà dyà “Yesù Kilistò” pamutù pàà “Taatù, Mwânà, ne Nyumà Mwímpè” kûdì beena Assemblées de Dieu, bôbò bàkaavwa bamanè kwela lwongò mu mùshindù wà kabàyikù mwà kucishintulula to. Kâdì mbamanyè ne Cidi Bulelèlè! Mêmè ndi ngeela yônsò wa kùdìbo kadyòmbò bwà àndeejèku ne Cyôci aci kacyèna cilelèlè ku Bible. Kakuyì mpatà to m'Bulelèlè. Kâdì cîdìbo mwà kwenza ncinyì? Kabèèna mwà kucyènzakù to. Nwamònù's, mbafwànyine kutùpa ku twìtabààyi yàbò ayi, kabèèna mwà kucyènzakù to.

⁹³ Pashiìshe ba-Unitaires bààkenza cinyì? Pamutù pàà kuCìtababò ne kutùngunukabò, kulwabò buumàkàne ne: “Nzambì àbeneshiibwè kashidi! Twétù mbàdì ne Bukènkè, kâdì nwénù kanwèna naabù to. Twétù mbàdì . . .” Cyàkenzàbo ncinyì? Bákacivwija bulongolodi. Kwêna mwà kuvwija Nzambì

bulongolodi to. Nzambì kàtu mene ne mmwènekelu wa kwísùkwísù to, mùdì Bible mwambè. To, cintu nànscha cìmwè cyà kwísùkwísù bwà Nzambì kacìtuku to.

⁹⁴ Mpindyewu, pashiìshe beena Assemblées kuteetabò bwà kuMuvwija bulongolodi ne kubàvwija...wabò...wabò bôbò ki—ki—ki Èkèleeziyà mulelèlè. Ki pashiìshe ba-Unitaires kulwabò, kuteetabò bwà kuvwija wabò awu bulongolodi, ne “bàvwa ne Bukénkè butàmbidile.” Ki kwenzabò cinyì? Bôbò kubùjìma ku mushindu wàbò sungasunga wà budisù, wà bululu ùvwabo bènza maalu. Pamutù pàà kubwàbanyinangana butwè mukèlè ne kalolo, kuteetabò bwà kukòsa bwobùmwè ne mukwàbò awu, bwà kabìikadi nendè bwalu to. Nènku ki cyàkanyangà maalu's. Bùvwa butangàlaké, dîbà adi. Katancì aka anyì, mukwàbò kujuukayè, bôbò kupeta cikampàndà, ki mpindyewu kutapulukabò. Umwe kwambayè ne: “Ülwalwa pa kabalù katòoke.” Mukwàbò ne: “Ülwalwa pa ditutu ditòoke. Nzambì àbeneshiibwè, mêmè némbangilèpu bwànyì bulongolodi.” Nwamònù mùdibò bàcyènza amu anyì? Kutangalajaci muulà—muulà's. Cyôcì kwenza cinyì? Kushipaci buuwetù.

⁹⁵ Bantu bakàjì bààbûngì, bantu balùme, dilòòlò edi, mu Assemblées de Dieu, mbaswè bwà kulwa kubàtijiibwa mu Dînà dyà Yesù Kilistò, bamanyè ne Ki Bulelèlè bwà Nzambì. Mbafwànyìne kwipaciibwa bu bôbò mwà kucyènza.

⁹⁶ Ne ba-Unitaires bààbûngì bàà...Mpindyewu, mêmè ncìtu Unitaire to. Ncìtu ngiitabuuja mu “bùmwè” mùdibò bôbò biìtabuuja amu to. Ncìtu ngiitabuuja Yesù mùdibò bôbò baswè kwamba ne: “Yesù” amu to; kùdi baaYesù bûngì cyanàànà. M’Mukalenge Yesù Kilistò. Ncyà bushùwà. Mpindyewu, ne mêmè ncyêna...Ndi ngiitabuuja aci bishìllàngànè ne cìdibo bôbò biìtabuuja aci kule. Bôbò bâdi bàbàtiiza mu Dînà dyà Yesù, mu Dînà dyà Yesù bwà difùkuludiibwa, ne “Kubàtijiibwa (difùkuludiibwa) kùdi kùkutwàdila Kilistò bwà dibàtiiza dyèbè dyà mu mâyi adi.” Mêmè ncyêna ngiitabuuja aci to. Mêmè ndi ngiitabuuja ne difùkuludiibwa didi dìlwa ku Mashì à Yesù Kilistò ku Nyumà Mwîmpè. Ncyà bushùwà. Dibàtiiza didi ànu cyenzedi cyà pambèlu bwà mudimu wà munda wà difùkuludiibwa wùdì mwenjiibwe. Nwamònù anyì? Pa nànkù, mêmè ncyêna ngiitaba aci to. Abi bìdi ànu bîmpè's, kàdi bônsò mbânà bëètù.

⁹⁷ Pâncìvwà mbangilakù bu muyiishi wa ba-Baptistes, bàvwa bâlwa kûndì bàmba ne: “Mwanéetù Branham, lwâku kùneeku, twêtù—twêtù—twêtù mbàdì naaCi ne tudi balwè naaCi apa.”

⁹⁸ Mêmè ne: “Kí ng’ewu anyì ewu wa kunùdì to, mêmè ndi mwimàne pankaci pàà tusùmbù tûbìdì atu mene ngamba ne: ‘Tudi bânà bàà muntu!’” Nànscha ciikàlé cinyì, nànscha bu muntu

mwà kubènga, aci kacyèna ne cìdici cìshintulula to nànsha kakesè bwànyì mêmè, yéyè ùdi ànu mwanèètù.

⁹⁹ Ndi ne mwanèètù utu munangè mâmpà meela pomè; mêmè ntu munangè ngamba kufwà mampà meela tumpùlùmànjjé, kàdi ncyàkushipa nendè malanda to. Yéyè ùdi mwà kudyà dyâmpà dyèndè dyela pomè adi ne mêmè kudyà dyâmpà dyànyì dyela tumpùlùmànjjé adi. Ne mêmè ngèèla *citâpitâpi cyà mayi* pa dyànyì apu, yéyè kàyi muswè abi to, mòna's, yéyè's ùdi ànu mwà kudyàngata. Nudi bamanyè ne... Ncinyì aci? Bintu bivundula bìdìbò bëèlapù abi, nudi bamanyè's, "busùkusuku buvundula's." Mêmè ntu munangè aci. Nkààdi ngenda nkùlakaja bikolè mpindyewu bwà kubìdfa, kàdi bìdi... Kàdi ndi—ndi—ndi... Ki bïntù mêmè munangè's. Yéyè kàyi mubinangè to, kabyéna bìkèngela bwà àbìdyè to. Abi's bidi ànu bîmpè, mêmè nêndye dyànyì adi. Kàdi yéyè's ùdi ànu mwanèètù! Ncyà bushùwà.

¹⁰⁰ Ne pa nànku mêmè—mêmè ntu munangè aci, ntu munangè bwobùmwè. Kàdi patùdi twelelangana mikàlù mùshindù ewu, twamba ne: "To, edi ndingumba *dyètù twêtù*," ne katùyi baswè kwolola cyanza bwà kulabulangana ku cyanza ne mukwàbo awu, kàdi twamba ne: "Nzambi àbèneshiibwe, mwanèètù!" Ekèlekèle! Apu's ki paùdi ubìikila ne ki bwobùmwè. Wêwè kùyi wenza nànku to, udi upeta muji wà bululu awu ànu mwàkàwùpetà beena Seemùnà abu kale wàwa amu, ne udi ukakèba cintu ànu cyôcì cìmwècìmwè aci. Èyo, nànku dînà dyàbò divwa "bululu."

¹⁰¹ Beena Nikàlàwù bàvwa batùngùnùke ànu ne kubàpàtakaja mweyelu too ne mu Bikondo byà Mîdimà. Cikondo cyà Luther ncyàkapàtulà citùpà cyà kumpàlà cyà ngâssà, ndambù wa Bukènkè kubangayè kukenka. Pashìishe kulwakù paanyimà pàà aci, kulwakù John Wesley ne dijidiibwa, kutàmbabù kukenkesha ndambù. Ki pashìishe kulwakù dibàtiiza dyà Nyumà Mwîmpè ne beena Mpenta, cyàluja cyàkàbìdi diitabuuja dyà baataatù. Kàdi kabàvwa mwà kucìlama mùshindù awu to, nùnku bìvwa bìkèngela bwà bâcivwijè bulongolodi, ki pashìishe kubangabò cyàkàbìdi kwalukila mu cyena Nikàlàwù. Ànu menemene cìdì Bible mwambè ne nebènzè aci.

¹⁰² Mpindyewu, bìkèngela ntàngilè kaaba aka bwà cyanàànà nénçibwejè... nêngàngatè dîbò dipítèpite bûngì. Tùyaayi ku mvensà mwi2, anyì... aci ncifwànyine kwikala mvensà wa 8, wa 9. Èyo, mpindyewu dikèngeshiibwa, mvensà wa 9:

Ndi mumanyè byenzedi byèbè, makèngeshiibwa èbè, ... bupèlè, (kàdi udi mabanji)... (Kaa, ekèlekèle!)... Ndi... (Mpindyewu Yéyè udi wàmbila Èkèleeziyà mpindyewu, Èkèleeziyà mulelèlè, kayìyi mikwàbò ayi to; bôbò mbàvwà bakìne byenzedi byà beena Nikàlàwù abi.)... Ndi mumanyè dipenda dyà Nzambì dyà aba bâdì bâdyàmba ne mbeena Yudà,

kàdi kabàyi nànku to, kàdi bôbò bàdi nsunàngòngà wa Sàtaanà.

¹⁰³ Mpindyewu, bàvwa bàdyàbakeena. Bàvwa batuuta kùdì bulanda èyo. Bà...Bàvwa babànyènge byônsò bìvwàbo naabì. Bàvwa biibàke kaèkèleezìyà kààbò kakesè mùshindù ewu, ne bu muvwàbo kasùmbù kakesè menemene, bàkaavwa babipàte, èkèleezìyà munène awu nguvwa mubipàte, babapàtakàje ànu mweyelù's. Ne nCyambè ne: "Ndi mumanyè. Ndi mumanyè ne bìdi bìkèngela bwà nwénù kwikala kudìsangishila mu disangu, nudi nudìsangishila mu kajila, anyì mwaba mukwàbò kanà wônsò wunùdì mwà kudìsangishila awu." (Ne mêmè nkààdiku tuyè mu nkítà yà mwinshì mwà buloba mùdìbi bìkèngela kwikalabò bâdìsangishila amu; kupweka mwinshì mwà buloba amu bwà kudìsangishilamù, ne bikwàbò muntwamu.) "Ndi mumanyè makèngeshiibwa èbè, ne ndi mumanyè ntàtù yèbè, ne bikwàbò byà mùshindù awu, kàdi udi muvvijìibwe mubanji ku makèngeshiibwa awu." Kaa, ekèlekèle! Anjì ngambilaayi tûng dìbà dìdì dikengeshiibwa dìkwàta Èkèleezìyà, s'didi dìMupà dikàndà. Dìtu misangu yônsò ànu dìpa Èkèleezìyà dikàndà, mu makèngeshiibwa awu. "Ndi mumanyè makèngeshiibwa èbè, kàdi udi mubanji." Bwà cinyì? "Wêwè udi mushààle ànu kacya wâNdamata; udi mubanji. Kàdi makèngeshiibwa èbè awu kaènakù akutàpa ku mwoyi to."

¹⁰⁴ Mpindyewu, kùdì...Nukààvwakù bamònè anyì? Beena Nikàlìawù bàkaavwa badipetèle ne nsunàngòngà mpindyewu. Ki cìdì Bible mwambè mwab'ewu. Nukààvwakù bacìmònè mwab'ewu mu mvensà wa 9 amu anyì?

Mpenyì...kàdì...kabàyi nànku to, kàdi bàdi nsunàngòngà wa Sàtaanà.

¹⁰⁵ Uh-huh, Èkèleezìya mulelèlà ùkaavwa mwipàcìibwe. Beena Nikàlìawù bàkaavwa bangàte bukòòkeshi, ne...bàkaavwa biipàte bantu bàvwa ne Nyumà Mwîmpè, kì bwà cinyì bôbò—bôbò kabàcìwa ne dikwàcisha nànsha dikesè bwàbò bôbò to. Bu nànsha ne Seemùnà, mu Asie amu, üvwa mumanyè ne bintu abi...ne bifulu byà butùmbì byà bafwile diitabuuja bivwa mwà kwikala bibìndile, nùnku's mbanyùkùshìibwe. Nwamònù anyì? Mpindyewu, mu ngaakwìlù mukwàbò, cìvwà...pààkafundiibwà cipròfetà eci ne kutùmiibwaci kuntwaku, ne èkèleezìyà kucikwàtayè, ne kumònabò ne bôbò mbàvwa ne cyà kuvwàla cifulu cyà butùmbì cyà bafwile diitabuuja aci, mònà's, bôbò bàvwa mwà...mònà's, nùnku's ncibàkwàcishe bwôwà bwà lufù. Bàvwa bôbò bindile ciinè aci dìbà kanà dyônsò. Kacyàkalwa mu cikondo cyàbò aci to. Pashiìshe pàmwàpa bàmwè bàà kùdibo bààkamba ne: "Èè, udi mumanyè's—udi mumanyè's, ndi nkwambila ne, mupròfetà awu üvwa mutùpàkàne. Yone üvwa mutùpàkàne, yéyè—yéyè...bwalu kì ncitwènzèkèle mûneemu mu Seemùnà to." Mònà's, byàkakèngela

bidimu nkàmà paanyimà. Nwamònu anyì? Kàdi pàdì Nzambì wàmba cintu kampànda, cidi ne cyà kwenzeka.

¹⁰⁶ Pôpò apu ki patùdì twinyija diitabuuja dyètù, ànu pa Dîyì dyà Nzambì apu. Nzambì ùtu ûshààla mukwàte ku mulayì ne mulayì wónsò. Nànsha byôbì ne . . . Wêwè udi mufwànyìne kwela meeji ne bìkèngela cyènzekè mwab'ewu mene, kàdi pàmwàpa aci kí ncikondo cyà Nzambì bwà kwenzekaci to. "Kàdi Dîyì Dyànyì kadyàkwalukila kûNdì kadiyi ne cìdìdi dyenzi to, kàdi neDyûjè cìdìDi dipàngidikila." Nzambì misangu yônsò neàtwe ànu Dîyì Dyèndè mushinga, ne mu cikondo Cyàdì címpè Sungasunga neDinowè.

¹⁰⁷ Pa nànku bantu aba bàvwa mbôbò, èkèleeziyà wa kumpàla, kàdi mu èkèleeziyà awu mmùvvà ngiikàdilù uvwa mwà kupàtuka paanyimà mu èkèleeziyà wa Seemùnà. Mpindyewu, pashiùshe bàvwa ne cyà kuvwàla cifulu cyà butùmbì cyà bafwile diitabuuja, bìvwa bìkèngela bwà bààbûngì bàà kùdibo bashipiibwè.

¹⁰⁸ Mpindyewu twàngatààyi mvensà wa—wa 10, patùdì tubala eci apa:

*Kùciìnyi nànsha cìmwè cyà ku bintu ebi to
(nsunàngòngà wa Sàtaanà) biwìkalà mwà kukènga:
mònà, dyabùlù neànwéélè... nwénù mu bùlokò, bwà
nwamòna mwà kuteeciibwa; ne nwénù nenùpetè
dikèngeshiibwa dyà matùkù dikùmi: Wêwè ikàlà ne
lulamatu too ne ku lufù, nènku nênkupèshè cifulu cyà
butùmbì cyà mwoyi.*

¹⁰⁹ Kaa, ekèlekèle! Bâàkabàmbila bwà kabàciìnyi to pàvwàbo mwà kubìikidiibwà bwà kufwìlabò ntèndeelu wabò—wabò. Mpindyewu, Mwanèètù wa bakàjì Wood, mwaba wônsò wûdì awu, ndi ntèkemena ne eci cidi cìkukwàcisha. Mwanèètù wa bakàjì Wood ùvwa ùngambilà, ditùkù adi ne, ùvwa mufwànyìne kuumvwa ne lutàtu bwà cinyì bàmwè bàvwa mwà kusùngidiibwa kàdi bakwàbò to. Misangu mikwàbò bìkèngela ùmanyè... Nzambì wàkambilà bantu aba ne: "Mpindyewu, kanùciìnyi bwà bwalu abu to, bwalu Sàtaanà neànwéélèmu, bwalu kasùmbù kàà beena Nikàlàwù kàdì kalwè ne kànwèlamu aka, bwalu Mêmè nênnulekelè nùfwe bwà bwalu Bwànyì. Kàdi Nênnùpèshè cifulu cyà butùmbì cyà Mwoyi mu ditùkù adi." Pa nànku kanuyi...

¹¹⁰ Mpindyewu tàngilààyi, Yèyè mmwambè... Mpindyewu, bu nwénù mwà kumóna patùdì tubala mvensà wa 10 ewu apa. Nganjì mmubalùlùlèbi:

*Kùciìnyi nànsha cìmwè cyà ku bintu ebi biwìkalà
mwà kukènga to: mmònà, dyabùlù neélè bàmwè bàà
kunùdì mu bùlokò, bwà nwamòna mwà kuteeciibwa; ne
nwénù nenùpetè dikèngeshiibwa dyà matùkù dikùmi:*

kàdi wêwè ikàlà ne lulamatu too ne ku . . . (Nukààvwakù bamònè ne aci kacyèna too ne ku anyì? Kî nnè too ne ku lufù to, kàdi “ku” lufù to. Nudi bacyúmvwè anyì?) . . . wêwè ikàlà ne lulamatu ne ku lufù, . . . (Nwamònù anyì? Ne bôbò bààkashààla ne lulamatu.)

¹¹¹ Mpindyewu Yéyè kwamba, Sàtaanà . . . Nukààvwakù bamònè ne nganyì udi Yè—nganyì udi Yè mutèèkè ne nguvwa wenza aci awu? Mpindyewu, nsunàngòngà wa Sàtaanà ewu ùvvwa “mbeena Nikàlàwù.” Aci tudi bamanyè. Kabivwa nànkù anyì? Dibà adi civwa mbulongolodi, bwakwidi bùvvwà bùjuukà bùvvwà mwà kukèngeshisha bantu aba, bùvvwà mwà kukèngeshisha bantu aba, kàdi bìvwa bikèngela bwà kwikalabò ne lulamatu ku Èvànjeeliyò ne ku lufù. Nukààvwakù bamònè mu mushìngà wà dibàkà anyì? kî nnè too ne ku lufù nkutùdì tutàpuluka to, kàdi “ne ku lufù nkutùdì tutàpuluka.” Nwamonus anyì? Mpindyewu, ne ku ne too ne ku mbishiilàngàne. Mpindyewu, bìvwa bikèngela bwà kwikalabò ne lulamatu kùdì Kilistò ne ku lufù. “Pwekà wêwè ànu naacì ku lufù aku. Kùciinyi to, bwalu Mêmè nénkupèeshè cifulu cyà butùmbi.”

¹¹² Mpindyewu “matùkù dikùmi” àdìbo baàmba mwaba ewu aa, matùkù dikùmi awu. Ditùkù mu Bible dìdi dìleeja cidimu. Nènku matùkù dikùmi àvva “mbidimu dikùmì” byà ndekeelu byà bukòòkeshi bwà D-i-o-c-l-é-a-t-i-o-n ewu, Dioclétien. Dioclétien. Dioclétien, ùvvwa mfùmù munène wa bukalenge bwàlabbà awu wâkakòòkeshi mu byà ndekeelu . . . Èè, kùvvwa bamfùmù mulongolongo bàà makalenge maalàbàlè bààkakòòkeshà musangu wà Cikondo cyà Èkèleeziyà wa Efèsò. Ne Nérón, ngeela meeji, ùvvwa umwe wa kùdibo. Kàdi Dioclétien ewu mwab’ewu nguvwa wa ndekeelu wâkakòòkeshi, mu bidimu dikùmì byà ndekeelu abi, kàdi yéyè nguvwa mutàmbe kwikala mukèngeshanganyi ku bônsò ku dyela dyà mashi pansi. Wàkadítèèka ànu ku luseke lwà kasùmbù aka nènku bôbò—bôbò kushebeyabò beena Kilistò ne cikisu, kubàshebeyabò, bàkabòòsha, bè—bènza bintu byônsò, ne bìvwa mbidimu dikùmì byà dikèngeshiibwa dyà ditàmbe kwikala dyà mashi. Ne cikondo cyèndè ne bukòòkeshi bwèndè bìvwa kuumukila ku cidimu cyà 302 too ne ku cyà 312. Aci ki cyàkajikijà Cikondo cyà Seemùnà, ne dibwela dyà Constantin. Nènku yéyè wàkalwa mu cidimu cyà 312, Constantin awu. Ki àvvà matùkù dikùmì à makèngeshiibwa. Nènku cyàkabanga ne Nérón ne cyàkajika ne Dioclétien. Nènku kubangaci ne Nérón, civwa lwà mu cidimu cya 64 paanyimà pàà lufù lwà Yesù pààkabàndà Nérón mu nkwsa.

¹¹³ Mpindyewu, mvensà wa 11 mmulayì. Mpindyewu netwàngatè eci kumpàlà kwà kujikija:

Ewu udi ne macì, ümwè cìdì Nyumà wàmbila maèkèleeziyà; Ewu udi ucimuna kààkutacishiiibwa ne lufù lwibidì to.

¹¹⁴ Mpindyewu, bìkèngela ngămbèkù cintu kampànda kaaba aka, aci bwà . . . Mémè ncyèla meeji, mu mwɔyi wànyì, kàdi ncìyi ncyàmba to, dìbà adi ndi mwena lubombo. Nwamònú anyì? Ndi muswè bwà nwénù kumòná cintu kampànda mu Mufündù ewu, ne ndi ngeela meeji ne cìvwa bwànyì mêmè cimwè cyà ku bintu bikolè bwà kuumvwa byà bitàmbe bunène ntàntà mule too ne pângààkalwà kujandula. Mpindyewu tûbalààyi aci ne ntèmà yônsò, mpindyewu. Nwamònú anyì?

Ewu udi ne macì, (Mu ngaakwìlù mukwàbò ne: “udi ne macì à kuumvwa,” nwamònú’s, makàngwila Nyumà.) ümvwè cìdì Nyumà wàmbila maèkèleeziyà; . . .

Mpindyewu mònaayi, cintu cìmwècìmwè eci, dikèngeshiibwa edi ne bikwàbò byônsò bìdi bìlwa. Katùpà ne katùpà kààcì kônsò kàdi kàtentamangana ne èkèleeziyà ne èkèleeziyà yônsò. *Maèkèleeziyà.*

. . . *Nyumà wàmbila maèkèleeziyà; Ewu udi ucìmuna . . .* (Mu èkèleeziyà kaayi? Wa beena Efèsò anyì? Èyowà. Eyo. Seemùnà anyì? Èyowà, yônsò ayi.) . . . *Ewu udi ucìmuna mu èkèleeziyà yônsò kààkutàshiibwa ne lufù lwibidì to.*

¹¹⁵ Yéyè ùdi ucìmuna cinyì mu èkèleeziyà wa Laòdìkiyà? Udi ucìmuna beena Nikàlìawù, ùcìmuna maalu à pa buloba, ùcìmuna màngumba aa, ùcìmuna byà bunsaserdòsè ebi, ùcìmuna bintu byônsò byà pa buloba ne ùdifula, ne ùnanga Kilistò. Kwàkutàcishiibwa ne lufù lwibidì to. Bwà cinyì? Ùdi ne Mwoyi wà Cyendèlèèlè. Mwoyi wà Cyendèlèèlè kawéna mwà kufwàku to. Yesù wàkamba ne: “Ewu udi umvwa dìyì dyà kùNDì ùdi ne Mwoyi wà Cyendèlèèlè, kàadyàkufwàku to. Nêmmubiìshè ku lufù ku ditùkù dyà ndekeelu.”

¹¹⁶ Mpindyewu, mpindyewu, kùdi . . . Mpindyewu, newìkalè mwà . . . Nekwìkalè bààbúnìgì bààbènganganà ne cyôci eci, kàdi ndi muswè bwà nwèlanganè meeji bikolè kumpàlà kwà nwénù kwangata dipàngadika dyènù. Nwamònú anyì? Néngambè cintu kampànda mpindyewu:

¹¹⁷ Ki bwà cinyì ncyêna ngiitabuuja ne kùdi ifernò wa Cyendèlèèlè to. Kakwèna mwà kwikala ifernò wa Cyendèlèèlè to. Bwalu bu ne kùvvakù ifernò wa Cyendèlèèlè, dìbà adi kùvvwa misangu yônsò ànu ifernò wa Cyendèlèèlè, bwalu wa Cyendèlèèlè . . . Kùdi mùshindù wà Mwoyi wà Cyendèlèèlè ànu wùmwèpelè, ki utùdì bônsò tuditacishila. Nênkú byôbì ne newòshikè kashidi ne Cyendèlèèlè, nànkú’s nebìkengelè bwà wíkalè ne Mwoyi wà Cyendèlèèlè munkaci mwà kwoshika, ne dìbà adi’s ncifwànyine kwikala Nzambì munkaci mwà kwoshika. Kwêna mwà kwikala ne iferno wa Cyendèlèèlè to, kàdi Bible ùdi wàmба patòòke ne “ifernò wàkafùkìibwa.” Ne piikalaye mufùkìibwe, kí ngwà Cyendèlèèlè to. Cintu kanà cyônsò cìdì cyà Cyendèlèèlè eci kacìtukù cífùkìibwe to; cìvwa

ànukù misangu yônsò, ncyà Cyendèlèèlè. Ne Bible ùdi wàmба ne “Ifernò wàkafukiibwa bwà dyabùlù ne banjèlò bëndè.” Ifernò wàkafukiibwa, kî ngwa Cyendèlèèlè nànsha. Ne ncyêna ngiitabuuja ne muntu neànyookiibwè Cyendèlèèlè to.

¹¹⁸ Ndi ngiitabuuja ne Bible ùdi wàmба bitòòke tòò apa, ne: “Ewu udi ucimuna kàkutàcishiibwa ne lufù lwibidì to.” Mpindyewu “lufù.” Mwakù *lufù* wùdi wùfùmina ku...mbwena kwamba ne, cidi “ditapuluka.” Mpindyewu, patùdi batàpulula ne Nzambì, mu mpèkaatù, tukààdi bamanè kufwà; ki mùdì Bible mwambè. Tudi basàkìibwe kule ne Nzambì, tudi bakòsa, tudi bafwè mu mpèkaatu ne mu matomboka; tudi beenyi kùdì Nzambì ne ku bubanji Bwèndè busanga. Ne pashiishe patùdi tupeta Nzambì ne tupeta Mwoyi wà Cyendèlèèlè, tudi bânà Bèndè ne citùpà cyà ku Yéyè.

¹¹⁹ Mwanàànyì wa balùme mutekètè wàwa, Joseph, ùdi citùpà cyà ku mêmè, nànsha cindì...mufwànyine kwenza ciikàle cinganyì. Yéyè... Ndi mufwànyine... Yéyè mmufwànyine kwikala kàyi ne... Bu ne mvwa muntu mubanji munène ne mwikàle ne bumpyànyì bûngì cyanàànà, yéyè mmufwànyine, kubènga kupyàna mene kantu; kàdi yéyè ùdi ànu mwânà, ùdi citùpà cyà ku mêmè. Bushùwà, yéyè ùdi citùpà cyà ku mêmè. Mpindyewu, ncyêna mwà kumuvilakù to ànu mûndì nciyi mwà kudìvila mêmè mwinè to, bwalu yéyè ùdi citùpà cyà ku mêmè. Diteeta dyà mashi ndifwànyine kuleeja ne yéyè ngwanyì mêmè. Nwamònú anyì?

¹²⁰ Ne diteeta dyà Mashi dìdi dileeja ne wêwè udi wa Nzambì anyì to. Nwamònú anyì? Nudi bânà bâà Nzambì ne nudi ne Mwoyi wà Cyendèlèèlè. Kàdi musuùkà wùdi wènza mpèkaatù, *musuùkà* awu ki wàtàpuludiibwà. Ncyà bushùwà anyì? Dibà adi kawàkwikalakù kàbidi to. Mpindyewu tàngilààyi. Cintu cyônsò cìvwà ne ntwàdijilu cidi ne ndekeelu, bwalu cintu cyônsò cìvwà ne ntwàdijilu mbufuki. Kàdi Nzambì kààkafukiibwa to, Yéyè ûvwa misangu yônsò ànu Nzambì. Kakwènakù mwaba uvwaYe mufukiibwe to. Nènku müşhindù wùmwèpelè wutùdiku mwà kwikala ne Mwoyi wà Cyendèlèèlè ngwà kwikala citùpà cyà bufuki abu. Butùmbi's wè! Kaa, twîkalapù mwà kuCimona's wè! Udi umònà cidi Nyumà Mwîmpè ùkwenzela anyì? N'Nyumà Mwîmpè, Mufuki Yéyè mwinè, Nzambì Taatù mu mmwènekelu wa Nyumà, ùbiìkidiibwa ne “Nyumà Mwîmpè” bwalu Ùvwa pa mubidi mubììkidiìbwè ne n'Yesù, Mwân'Endè; wâkafuka Yé Yesù awu, mubidi awu, ki bwà cinyì byàkakèngela bwà kufwàWù. Nzambì wàkasòmbela mu mubidi wa buntu ewu, ne kabùlù kàà mashi kààkataayika, ne Mwoyi wa mu kabùlù kàà mashi aku wàkaalukila.

¹²¹ Ki bwà cinyì mukuukwidi wa kale mu Dipungila Dikùlukulu kàvwa mwà kuumuka... ûvwa ùmuka ne dipiìlà dìmwèdìmè divwàye naadì pàvwàye mulwè adi. Kàdi mu Dipungila

Dipyadipyà, mùdì Ebèlù mwambè, ne: “Mukuukwidi pàdiye ànu ùkezudiibwa musangu wùmwè kàcyèna kàbìdì ne civùlukilu cyà mpèkaatù to.”

¹²² Mpindyewu, Dipungila Dikùlukulu; bàvva bàlwa ne mwânà wa mùkòòkò, ùvwa ùmulààdika pansi, ùmutentekela byanza, mukuukwidi awu; mwakwidi ùvwa ùmukòsa muminu, yéyé ùvwa ùmvwa mùvwàye ùzònza mashi, ne ùmvwa mwadi wèndè awu. Nènku ùvwa ûfwa, ne yéyé ùvwa ùmvwa kaamubidi kakesè aku kùùminyina, ne ùvwa mufwè. Ùvwa mumanyè ne uvwa ne cyà kufwa nyéyé; mwânà wa mùkòòkò awu ùvwa mwangàte kaaba kèndè. Mwakwidi ùvwa wàngata mashi awu, uàtèèka pa cyoshelu ne—ne mwîshì wùvwa wùbànda, nènku cìvwa ndisambilà dyà difwìdiibwa dyà luse bwà mukuuk-... [Katùpà kàà mukàbà wà mêtì munda mutupù—Muf.] ...kàdi mwoyi wà nyama awu kawùvwa mwà kwalukila pa muntu ne kukùmbanganaganawù ne wà muntu to, bwalu nnyumà wà nyama. Mwoyi wa nyama ne mwoyi wa buntu, kàyìvwakù mwà kukùmbanganangana to. Kàdi pàdì... Ki bwà cinyì ùvwa ùya ne dijinga dìmwèdimwè dyà kwenza mpèkaatù adi, cintu cìmwècimwè aci. Übwela bwà dyenda dyà masandi, ne ùlàmbula mulàmbù wèndè, kàdi wàlukila ne cintu cìmwècimwè aci mu meeji. Ncyà bushuwà.

¹²³ Kàdi apa pàdì mukuukwidi... Kaa, Èkèleeyiyà wa Nzambi, kanùpangikù kuumvwa eci to! Mukuukwidi, pàdiye ànu ùseemena bulelèlè kùdì Mwânà wa Nzambi ne ku diitabuuja ùtenteka byanza pambidi Pèndè (Kaa, ekèlekèle!), uMutàngila mumpàla amu ne makòdi awu maMulembèlè mwìsù, Mashi àMupwekela mwìsù, umvwa bisaamà abi byà “Nzambi Wanyì! Nzambi Wanyì! WàNdekèdi bwà cinyì?” Kaa, mwanèètù, paùdì umôna mushinga kaayì wùdì mukufwile, ne Üvwa Nganyi, Èmanùwèlè, Nzambi ûfwa pa kaaba kèèbè.

¹²⁴ Dìbà adi cìdì cyènzekà ncinyì? Mukuukwidi musangu awu, pààkataayishiibwà kabùlù kàà Mashi aka mu Mwânà wa Nzambi... Cìvwà cyenzè kabùlù kàà mashi aka ncinyì?

¹²⁵ Wèwè udi cinyì? Udi kabùlù kakesè kàà mashi kàdi kafùme kùdì tatwèbè. Mukàjì kàtu ne tubùlù twà mashi to. Mu—mukàjì ùdi yéyé ùpàtula ànu diyi; cyamù cyàtooyikila mayi, bwèndè bùdi ànu bwà kwambula twâ—twâ—twânà. Kàdi mashi àdi àfùma kùdì mulùme, ki bwà cinyì mwâ—mwânà ùdi wàngata dínà dyà taatù. Ne pashìishe, kàdi, mukàjì udi usèdiibwa kùdì mulùme, ùdi wangata dínà dyèndè, bwà bânà; mukàjì ùdi ulwa cyamù cya ditooiyishila mayi bwà mwânà wâmbwilayè mulùme awu. Kàdi ànu mûmvwà ngamba ne: cikuka cyà nzòòlo cìdi mwà kwela díyì, kàdi piìkalàci kacìyi cipetàngànè ne citààlà to, díyì adi kadyàkutooyikakù to.

¹²⁶ Mbwena kwamba ne, mêmè kwamba ne, ki bwà cinyì tudi ne èkèleeyiyà yàbúngì yà kale, ya mashika, ya bintu

byà kwísùkwísù leelù ewu. Bàvwa ne mmwènenu wa beena Níkàlàwù ewu, biikàle ne mushikì wà maswa mûle tèntè ne mayi mabolè, nènku kaàkutooyikakù nànsha bwalu kaëna... Wéwè udi mufwànyìne kubènzela cintu kanà cyônsò (kubàbìikila ne mbèèpiskòpó, balami, ne bikwàbò byônsò), kabààkwitabuujakù bimanyinu bìdì bílondà beena kwitabuuja to, bwalu kacya kabàtukù bapetàngàne ne Mulùme awu, Yesù Kilstò to. Bu wêwèku mwà kupetangana ne Mulùme wa bukolè bwà Nzambì awu...

¹²⁷ Pààkataayishiibwà kabùlù kàà Mashi aku ku Kàlvàriyò, ne Mwoyi wùvvwà munda amu awu, Yèhowàh mwânà... Kaa, s'bìvwa bìkèngela kwikalabì bìpapulangana's!

¹²⁸ Nudi bamanyè's, bantu bônsò bàdi bàkèba cimanyinu. Kî mmwômò anyì? Muntu yônsò ùdi wàmba ne: "Kaa, ndeejèku cimanyinu." Mwena Yudà wàkamba ne: "Ndeejè cimanyinu."

¹²⁹ Indìlaayi nnùpèèshè cimanyinu. Nzambì wàkanùpa cimanyinu musangu kampànda. Bààkalòmba cimanyinu. Izàlèèlà wàkalòmba cimanyinu. Kwambila Yè mupròfetà ne: "Némràpèèshè cimanyinu cyà kashidi: virgò neìmitè difù. Virgò neìmitè difù ne neàlelè Mwânà wa balùme." (Amen.) "NebàMwinyìkè dínà ne Èmanùwèlè, 'Nzambì neetù.'" Cimanyinu cyà citàmbe bunènè cìkaadiku cipèèbwé.

¹³⁰ Pàvvà Nzambì, Mufùki wa maulu ne buloba awu, mwenzè ndongolwelu wa dîbà ne mabùlùnga apu. Imànà ku Mukùnà wà Palomar kwàka ne ùtangidilè mu tulònđò kuntu kwàka, nènku udi mwà kumòna mìliyô lukàmà ne makùmi àbìdì ya bidimu byà bukénkè bwà cibwàshibwàshì. Andamunà cyôci aci mu kilòmètètà, kàdi dyàmwàma kùcidi ànu ngondo, ne mìtootò, ne maulu ne malaba, ne Yéyè ngwâkenza byônsò abi. Wàkabyèlela ànu mupùuyà ku byanza Byèndè nùnku ewu. Èyowà's!

¹³¹ Kàdi Mufùki munène awu ngwâkalwa Musùngidi wanyì. Kupweka ku kabùlù kakesè kàà Mashi, kakùyi ku mulùme to, kàdi mulwilè mu buuvirgò ku mukàjì kampànda; ne kwangata bungungu bukesè bwà kùdì mukàjì ebu, ne kuDifwimbila nzùbu mukesè ne kusòmbelamù. Kaa, s—s—s'bìvwa bìkèngela kwikalabì byà bìkòka ntèmà's! Yèhowàh! Yèhowàh, pa mushikì wà tûmvì twà nyama mu cikùmbì, ùdila mwadi. Yèhowàh, mu cidiilù cyà ngombe cyà bisoosà. Ki cimanyinu cyà kashidi ncyäci, bàmwè bâà ku bantu banènè badyàmbi aba! Yèhowàh, Nzambì, Mwânà wa mu dibòko ùdila mwadi (Àleluuyàh!) mu cikùmbì cìnunka mupùuyà mubolè. Ki pashìishe tudyàmbidila pètù mutùdì kampànda, mutàdike dyùlù muulu; mvùla's mmufwànyìne kumata, mufwànyìne ne kukutùkija; kàdi wenda uya pèèbè udylàmbidila mûdi kampànda. Nènku Yèhowàh mulààdika mu cikùmbì, pamutù pàà—pàà mushikì wà tûmvì twà nyama, udila mwadi bu mwânà mukesè... mwânà mukesè wa mu dibòko. S'bìvwa bìkèngela kwikalacì cyà cìkòka ntèmà! Aci's

ncimanyinu. Nzambì wàkamba ne: “Nênnupèeshè cimanyinu cyà kashidi.” Aci’s ncimanyinu cyà bushùwà eci. Yèhowàh, ùnaya bu mwânà wa balùme. Yèhowàh! Yèhowàh, ùkwàta mudimu mu ditanda dyà mukoonyi wa mabaya, ùkòsa mabaya ne mwelè wà mabaya bu mukoonyi wa mabaya. Àléluyàh! Ekèlekèle, kaa, ekèlekèle! Yèhowàh, wòwesha mulòbi mâyì ku makàsà. “Nênnupèeshè cimanyinu.”

¹³² “Kaa, kàdi bìkèngela twikalè ne balombodi bàà ntèndeleeu abu, nudi bamanyè’s, bavwàle mìzàbì ne myonjì yônsò yà mu bifùka ayi, nkoolò, ne . . .” Nwamònu anyì? Kaa!

¹³³ “Nênnupèeshè cimanyinu cyà kashidi.” Yèhowàh, Mwimàne mu bulà bwà tubàdì ne makòdi kwísù. Yèhowàh, mukùdika butakà, mu mubidi, pankaci pàà maulu ne buloba. Wàkadyombola bundù bwà nkùrusè. Tudi ne lupìngù Lwèndè kuntu kwàka ne kaamukùsù kakesè kaMujingila; mu bushùwà bwà bwalu awu ùdi ànu mmusongi wa lupìngu awu udi mwenzè nànkú. BâàkaMuvùùla bilàmbà kuMushìyabò butakà, kuMufwishabò bundù! Kaa, musùmbà wa beena lubombo awu abu pààlwà dìbà adi! Edi nditùkù dyà muntu, ditùkù dyà Mukalenge dìlwalwa. Yèhowàh! Yèhowàh, ùpùnga ne lufù, èyowà, cintu nànsha cimwè kaciyi cyenzèke to. Yèhowàh, ùsambilà, cintu nànsha cimwè kaciyi cyenzèke to. Hmm. Ncyà bushùwà. Cìwà ne cyà kwikala cyà cìkòka ntèmà! S’ki cimanyinu cyà kashidi ncyôcì aci. Ki cimanyinu ncyôcì aci cìvwà bantu bônsò bafwànyine kumanya. Pashìishe kufwàYe, Yèhowàh kuwàYe. Pashìishe buloba kubangabù kuzakala. Kaa, ekèlekèle!

¹³⁴ Pashìishe Wàkakuuka mu lukità ne wàkabànda mu Dyulu. Yèhowàh, wàlukila mu mmwènekelu wa Nyumà Mwímpè bwà kwikala ne mwoyi mu Èkèleeziyà Wendè, munkaci mwà bantu Bèndè. Butùmbi’s wè! Yèhowàh, wènda ùpìcila mu èkèleeziyà, ùjingulula meeji à mu mitù. Yèhowàh, wòndopa babèèdì. Yèhowàh, wàkwiла ku mishìku mu mùshindù wà muntu awu kàyì ne bukòntonyi bwèndè yéyè mwinè to. Yèhowàh, wàlukila mu Anglais ne ùcikudimuna. Udi ukèba cimanyinu anyì? Amen! Yèhowàh awu wàkapweka kuya kùdì ndumbà, kumujuula pansi, mwaba wùvvwàye-wùvvwàye wa ciipansi menemene mu mùshindù wà mbwa kayiyikù miswè kumutàngila to, ne kumusukula kumuwwija mutòòke tòò bu nêjè ne kumupèeshà mwoyi mukezùke bu mudi cilòngò cyà mbata amu. Kaa, ekèlekèle! Yèhowàh, wàngata kanwàyì mulààle kwàka mu kajila ne njiji ku mishìku kwônsò eku, ne umufikisha ku diyiisha Èvànjeeliyò . . . Mashi à Yesù Kilistò miikàle àtùkezula!

¹³⁵ PàvwàYe pa buloba, Wàkaya ku cimenga cìvwà citàmbe kwikala cyà ciipansi cìvwàku, ne kùdì bantu bàà batàmbe kwikala bàà ciipansi bàvvàku, ne kuMutwabò dînà dyà ditàmbe kwikala dyà ciipansi dìvvàku adi. Ncyà bushùwà.

BààkaMwenzela byà bitàmbe bibì, ne kuMutwabò dînà dyà ditàmbe bubì dìvwàku difwànyine kubììkidiibwa ne: “Beelèzèbùlà,” démon. Dyà ditàmbe kushààdila dìvwàbo mwà kuMupèèsha, dyàkaMupèèshà muntu.

¹³⁶ Kàdi Nzambì wàkaMubiìsha ku lufù, ne WàkaMupèèsha Nkwasa wa butùmbi wa kuulu menemene mu mùshindù wà bikèngela Àtangijè mésù pansi bwà kumònà Yè Dyulu. Amen! Butùmbi's wè! Ne kuMupèèsha Dînà kumutù kwà dînà dyônsò dìdì diteèdììbwé mu Dyulu ne pa buloba, ne fàmiyè mujimà mu Dyulu ne pa buloba mmuMwinyika Yéyè. Ki meeji àkaMwelelà muntu ngôwò awu; ki meeji àkaMwelelà Nzambì ngôwò awu. Éyi Nzambì, enzàku bwà meeji àànyì ìkalè bu Èbè, Taatù. Èyowà's, mukalenge. Éyi Dînà dyà mushinga!

¹³⁷ Mpindyewu: “Ewu udi ungiitabuuja Mêmè ùdi ne Mwoyi wà Cyendèlèlè.” Mpindyewu, piìkalàku mùshindù wa Mwoyi wà Cyendèlèlè ànu wùmwèpelè, nènku wêwè uwùpeta ne twêtù twenda tukèbangana naawù kupìcila kù Yesù Kilistò, s'ki Mwoyi wà Nzambì ngwôwò awu. Dîbà adi pààkataayishiibwà kabùlù kàà Mashi aku pa Mwânà wa Nzambì, ne Yéhowàh mukèse uvwa mukàngila mu mùlàngì munda mwà Muntu wâkabiìkidiibwà ne n'Yesù awu (pàvvà munda Mwèndè musòmbèle kaabujimà kàà Bunzambì mu mùshindù wà mubidi apu), nènku mpindyewu patùdì twitaba Mashi *awu* bwà dilekelediibwa dyà mpèkaatù yètù, Nyumà awu uvwa kàyi pambidi pàà muntu to, kàdi pàà Nzambì... Butùmbi's wè! Bible mmwambè ne: “Mashi à Nzambì.”

¹³⁸ Muntu kampànda wàkamba ne: “Vùlukà ne, Yéyè... Kwàmbikù cintu nànsha cìmwè pa bìdì bìtàngilà beena Yudà to, bwalu Yéyè ùvwa mwena Yudà.” Yéyè kàvwa mwena Yudà to. Kàvwa nî mmwena Yudà nî ngwa bàà Bisàmbà byà bendè to, Yéyè ùvwa Nzambì. Ncyà bushùwà. Yéyè ùvwa Mashi mafùka. Nzambì wàkacìvvija cyà pabwaci. Ùvwa Wa Yéyè mwinè, ne ku Mashi mafùka awu tudi tuñítaba bu ditùfwila dyà luse bwalu Yéyè wàkafwà lufù alu bwètù twêtù. Kabùlù kàà Mashi aku kààkabwayika, kulekelelakù Nyumà Mwímpè awu bwà kulwa Yè pambidi pèètu, nènku mpindyewu tudi bânà bàà balùmè ne bàà bakàjì bàà Nzambì ku dilediibwa dyà Nyumà. Dîbà adi Mwoyi wùvvà wà Nzambì awu, wùvvà kawùyi ne ntwàdijilu anyì wìkalà kawùyi ne ndekeelu awu, ngwànyì mêmè ne ngwèbè wêwè ku ngâsà wa Nzambì mu Yesù Kilistò. Ki bwalu mbwôbù abu's.

¹³⁹ Mpindyewu, “ifernò,” netwàlukilè ku cyôci aci mu katancì emu. Ndi nnwàmbila ne—ne kakwènákù mwà kwikala... Ndi cyà bushùwà ngiitabuuja ifernò wa ùlìkuka kapyà awu. Èyowà's, mukalenge, Bible ngudi mwambè nànnku, dijiba dyà kapyà. Mpindyewu, kàdi aci kacyèna mwà kwikala cintu cyà kashid-... kacyèna mwà kwikala cyà Cyendèlèlè

to. Ncifwànyìne kwikala... Bible kàtukù mwambè ne ngwa Cyendèlèlè to, Ùdi wàmba ne ifernò "wa kashidi" awu. Kéna wàmba mwakù wa Cyendèlèlè to, ùdi wàmba ifernò "wa kashidi" awu. Mpindyewu, mmulongolwela dyabùlù ne banjèlò bëndè; ifernò wa kashidi, kàyi wa Cyendèlèlè to. Mpindyewu, paanyimà... Musùùkà awu wùdì mwà kukèngeshiibwamù bwà byenzedi byàwù munda mwà bidimu mìliyô dikùmi, bwà cyônsò cîndìku pàànyì mumanyè. Ncyêna mumanyè cidi *wa kashidi* mufwànyìne kwikala ku mêsù kwà Nzambì to. Ncifwànyìne kwikala bwà tusunsa tútaanu, ncifwànyìne kwikala bwà bidimu mìliyô, ncifwànyìne kwikala bwà bidimu mìliyô dikùmi, kàdi nekùlwe cikondo cììkalà musùùkà awu mwà kulekela diikalakù.

¹⁴⁰ Cìdì Bible mwambè ncyôcì eci, nwamònou's:

... *Ewu wàcìmuna kààkutàcishiibwà ne lufù lwibidì to.*

¹⁴¹ Lufù lwà kumpàla nditàpulukangana ne bananga bëètù. Tudi tubwela mu Bwikadi bwà Nzambì, kî mpambèlu pàà Bwikadi Bwèndè to. Nwamònou anyì? Mpindyewu, piìkalàbi ne kùdi lufù lwibidì, dîbà adi's cìdì ne cyà kwikala lufù lwà musùùkà. Nènku dîbà adi ewu udi ucìmuna maalu a pa buloba, anyì ùcìmuna bintu byà pa buloba, ùdi ne Mwoyi wà Cyendèlèlè ne kààkulengiibwa kùdi lufù lwibidì to. Ki bwalu mbwôbù abu's, Mwoyi wà Cyendèlèlè. Kàdi—kàdi ngènzàmpèkààtù... Bible mmwambè ne: "Mukàjì udi ne nsòmbelu wa bisànkasanka mmufwè pàdiye ne mwoyi apu." Ncyà bushùwà anyì? "Musùùkà wùdì wènza mpèkaatù, wôwò awu newùfwe bulelèlè." *Kufwà* ncinyì? "Kutàpuluka" ànu menemene, "kùciyikù kàbìdì to." Nwamònou anyì? Mpindyewu, mmukòsòlola, ncyà bushùwà. Mmukòsòlola, kakùcyèna kàbìdì bwalu bwàwù to. Nebikengelè cikondo bule kaayì bwà cyôcì aci? Newùpwekè wùpicilè mu njila umwèumwè wùvvawu muvvilè awu, ne nebikafikè mu mùshindù wà ne kakwàkwikalakù kantu nànsha kàmwè kààshààla ku wôwò to. Newàlukilè ànu ku civvwàwu mwenjiìbwé aci.

¹⁴² Tudi bafwànyìne kwangata kabùlù aku, ne kutaayisha kabùlù kupeta kabùlù kàmwè, kupeta kabùlù kakwàbò, too ne paùdì ukafika ku kabùlù kàà kumpàla aku; ubwela mu kabùlù aku, dîbà adi udi ne mwengùngù wà mashi awu; udi ubwela mu myengùngù yà mashi mishìlèshìllangàne, ne pashìlshe udi upweka too ne ku katùpà kakesè kàà kabùlù aku: kí mwoyi ngwôwò awu. Bôbò kabèènakù mwà kupeta aci to. Kí mbamanyè kantu nànsha kàmwè pa bwalu abu to. Mpindyewu, ndekeelu wa byônsò mwoyi awu newùfike mu mùshindù wà kawùciyikù kàbìdì to; cyônsò cìdì mwengùngù wa mwoyi awu aci, mêmè ncyêna ngiitabuuja ne cìdì ne mwengùngù kampànda to. Ncifwànyine kwikala cyà nyumà.

¹⁴³ Ne pashiishe, mu cyôcì aci, ndekeelu wa byônsò necitapulukè ànu menemene ne kacyàkwikalakù kàbìdì to. Aci ki cìdì Bible mwambè ne: "Musùùkà wùdi wènza mpèkaatù, newùfwé." "Nènku aba bâdì bacimunà mu bikondo byà èkèleeziyà ebi kabààkutàcishibwa ne lufù *lwibidì* to." Mubidi wùdi wùfwá dyàmbedi, musùùkà wùdi wùfwá pashiishe ne kawàkwikalakù kàbìdì to. Nwamònú anyì? Aci cìdì... nudi nwitatuuja ne Bible ngudi wamba nànkú awu anyì?

¹⁴⁴ Mpindyewu vùlukààyi ne, ifernò yêyè mwikàle wa Cyendèlèlè, nànkú Bible's mmwambè cyà mafi pàdiye mwambè ne "ifernò wàkafukiibwa." Ne dîbà adi byôbì ne muntu neòshiibwé bwà Cyendèlèlè, mu ifernò, dîbà adi's bivwa bikèngela bwà ikalè ne Mwoyi wà Cyendèlèlè bwà kwikalayè mumanyè bìdì bìpitakanà, bwà kwoshikayè. Ncyà bushùwà anyì? Èè, kùdi mmwènekelu yà Mwoyi wa Cyendèlèlè bûngì kaayì? Umwepelè. Ncyà bushùwà. Mwoyi wà Cyendèlèlè ànu wùmwèpelè.

¹⁴⁵ Mpindyewu, kùumukukù wàya wenda wamba ne: "Mwanèetu Branham kàtu wìtabuuja ifernò to." Mwanèetu Branham ùtu cyà bushùwà wìtabuuja ifernò. Bible ùdi ùlongesha ne ifernò ûdikù. Ànu mudìbi bulelèlè ne kùdi mwaba wà—wà diikisha amu, kùdi mwaba wà—wà dinyookiibwa. Ne ncyà bushùwà ne Nzambì neenèzè ne musùùkà wùdi wùMwenzela mpèkaatù awu wùnyookiibwé. Nènku bwà kwikala mubèngé Yesù Kilistò bu Musùngidi webè, ncyà bushùwà ne newùnyookiibwé bwà bwalu abu. Kàdi nekwikàlè cikondo ciwìkalà kuciyikù kàbìdì to. Kàdi mmilìyò bûngì kaayì yà bidimu yìkalàbi mwà kwangata bwà wêwè kwalukila ku cyòcì aci, ncyéna mumanyè to. Kàdi cikondo kampànda...

¹⁴⁶ Udi muntu wa cikondo paùdì kùyi mulediibwe cyàkàbìdì, pashiishe udi muntu wa Cyendèlèlè. Ne mùshindù wùmwèpelè wùdi mwà kuCipeta nkvikala ne citùpà cyà Nzambì munda mwèbè, cìdì Mwoyi wà Cyendèlèlè awu aci. Nudikù mwà kucimóna anyì? Cyà bushùwà.

Ewu udi ne macì, ümvwè cìdì Nyumà wàmbila maékèleeziyà;...

¹⁴⁷ Mêmè ndi muMunangè. Kàdi wêwè? Ndi ne disànkà dyàbûngì dyà kwikala ne Mwoyi wà Cyendèlèlè. Aci kacyéna cintàcishakù kàbìdì to, bwalu tudi ne Mwoyi wà Cyendèlèlè mpindyewu. Ne ndi mumanyè nànkú, ne ndi ne dyeyemena ne muntu ne muntu neïkalè naaWù, twêtù bônsò.

¹⁴⁸ Irénée, èyowà, mvwa ne kabèjì mwab'ewu pa Irénée, kàà ne, "bwà kubala bwalu-bulonda ebu." Cìdì cyenzè ne Irénée àsungudiibwé mbwalu yéyè ûvwa ne bimanyinu byà Èkèleeziyà wa Mpenta (byà ku cibangidilu abi) bìmulonda.

¹⁴⁹ Mpindyewu, bu Nzambì... Mbanganyì bâdì biittabuuja ne Èkèleeziyà wàkabangila ku Mpenta? Èyo. Mbanganyì

bàdì biìtabuujà ne Nzambì mmuleejè patòòke ne mmwitàbe Èkèleeziyà wa ku Mpenta awu? Èyo, mukalenge. Dibà adi piìkalàbi ne awu nguvwa Èkèleeziyà wa kumpàlè wa Nzambì, ne ki cyòcì aci cyàkabiìkilà Ye ne “Èkèleeziyà,” ne Yeyè ùdi Mwonjì wà mvinyò mpindyewu, twêtù biikàle matàmbà, bu Mwonjì wà mvinyò awu mudìdìngé ànu mupàtùle ditàmbà dikwàbò, necììkalè cinyì? Cyà Mpenta’s. Èyowà! Mpindyewu, pàmwàpa kaciyyi ku dînà to. Mpindyewu tudi ne ménà à Mpenta, kàdi abi kí mbishiìlàngàne ne ba-Méthodistes, ba-Baptistes, ba-Presbytériens, beena Mpenta nànsha. Aci kacyèna cyùmvwija cintu to, nwamònù’s, aci’s cìdi ànu ndînà cyanàànà. Kàdi padibi ànu ne udi ne dilabula dyà Mpenta mu mwoyi wèbè, Mpenta mu musùùkà wèbè, ùkupeèsha Mwoyi wà Cyendèlèèlè, dibà adi Nzambì mmukulayè ne: “Kwàkulengiibwakù kùdì lufù lwibidì to;” ne, udi ne Mwoyi wà Cyendèlèèlè ne *kwéna mwà kulengiibwakù kùdì lufù lwibidì to*. Nwamònù anyì? Udi ne... udi...

¹⁵⁰ “Kanùbungamiji Nyumà Mwîmpè wa Nzambì to.” Mpindyewu, kanùMubungàmiji to (kwenza bintu bìdi bibì). Wêwè mwenzè, neùyoobè bwà bwalu abu; bwalu Bible mmwambè ne: “Kanùbungamiji Nyumà Mwîmpè wa Nzambì unùdì batwìbwé nendè citampì too ne ku ditùkù dyà bupikudi bwènù to.” Ncyà bushùwà anyì? “Kanùbungamiji Nyumà Mwîmpè to.”

¹⁵¹ Kaa! S’nedììkalè ditùkù dilenga dilayà, dìndà kampànda, dimwè dyà ku bikondo ebi. Bwà kunùleeja ne dibiìkà dyà ku lufù nedììkalè dyà dyènzechka pa buloba bujima, “Nekwìkalè bàbìdì mu budimi, ne Nêngàngatè umwe; ne bàbìdì mu bulààlù, ne Nêngàngatè umwe.” Nwamònù’s, necììkalè bufùku mu mwaba kampànda, ne mundààmuunyà ku lukwàbò luseke lwà buloba; necììkkalè dibiìkà dyà ku lufù dyà dyènzechka buloba bujima, Dyambwibwa adi. Mpungi wa Nzambì neàdilè, ne yônsò wa ku yoyì eyi, wa ku èkèleeziyà mikesè eyi *apa, apa, apa*, nànsha mene kaamusùmbà kakesè kààkapicilà *mwàmwa*, ne kapàtuke *emu, emu* aka.

¹⁵² Pàvvà virgò awu, virgò awu pààkamònàye mu cilù cyà mwandamutekète ne... Mpindyewu, vùlukààyi ne, kùvwa virgò mwandamutekète. Ncyà bushùwà anyì? Anyì, ndi njinga kwamba ne, virgò yìtaanu yàkapàtukà... Virgò dikùmi yàkapàtuka bwà katwilangana ne Mukalenge, yìtaanu yìvwa yà lungènyi ne yìtaanu yìvwa mikùtàkàne. Ncyà bushùwà anyì? Nènku mpindyewu, mu bilù abi nànsha nànkú, kùvwa bilù mwandamutekète. Nènku ku ndekeelu kwà cilù cyà mwandamutekète (yìmwè yìvwa milàale kubangila ku *eci* cilù, *eci* nùnku, *eci* nùnku, *eci* nùnku, ne *cyàcya*...), cilù cyà mwandamutekète, kupàtukakù dìyì ne: “Mónaayi, Mubàki nyawù ùlwa, pàtukààyi nùkatwilàngànè Nendè.” Ki kujuukayì è kulongolayì myèndù yàyì. Nènku mikwàbò yônsò eyi

kujuukayì myaba yônsò *eyi*. Kaa, aci kacyàkwikalakù cikondo cilenga cyà dikèma anyi's wè!

Kaa, kale wàwa tuvva twimba kaamusambu kakesè kàà ne:

Ncikondo cilenga be bwèbè wêwè,
Cikondo cilenga kaayipu bwànyì mêmè's wè;
Piìkalàbi ne twêtù bônsò tudi tudìlongolola
bwà katwilangana ne Yesù Mfùmù wetù,
Cikondo cilenga kaayipu ciìkalàku's wè.

Mònayi, twänjààyibì kumònà ní tudi mwà kwimba aci:

Cikondo cilenga be bwèbè wêwè,
Cikondo cilenga be bwànyì mêmè;
Piìkalàbi ne twêtù bônsò tudi tudìlongolola
bwà katwilangana ne Yesù Mfùmù wetù,
Cikondo cilenga kaayipu ciìkalàku's wè. (Abi
kabyàkwikalakù bilenga anyi?)

Kaa, kabyàkwikalakù bilenga kuntwaku,
Katùyikù ne bujitu bwà dyambula anyì?
Twimba ne disänka dyônsò ne tungonga twà
mu myoyi twônsò twimba,
Kaa, kabyàkwikalakù bilenga kuntwaku anyì?

¹⁵³ Mbanganyì bàà kunùdì aku bàdìku bamanyè ne nenùkafikè mu mèènù? Mbanganyì bàdìku bamanyè ne nenùpatukè ku ciibi kwàka? Kanwèna bamanyè to. Mbanganyì bàdìku bamanyè ne panwàpàtuka nenùlwe cyàkàbìdi? Kwêna mwà kumanya to. Pa nàñku kùlekedikù dilòòlò edi dipità to; kwèdikù Nzambì mâyì ku makàsà dilòòlò edi to, bwalu edi ndifwànyìne kwikala dilòòlò dyà ndekeelu dyûdìku mufwànyìne kupeta cikondo anyì mpùngà. Wêwè mwinè udi nganyi's, twamb'eku twamb'eku? Udi mufumìne penyi? Kûyaayà nkwpépi? Mukàndà wùmwèpelè pa buloba wùdìku mwà kukwambila cìdì bwalu, m'Bible wa kale mubènèshìibwe ewu. Ne mwinè awu m'Bible utùdì twêtù twitabuuja, ki Nzambì utùdì twitabuuja nyawù.

¹⁵⁴ Ne wêwè kùyi mubwelè mu Mukàji-musèla awu, mu kaamusùmbà kakesè kàà banyààbanyà aka, muyè mwinshì menemene *emu* leelù ewu mupàtula ku difimpakajiibwa dyà kùdì twitabààyì ne màngumba, ne bikwàbò, wêwè—wêwè—wêwè kùyi mu kasùmbù kakesè aku... Mpindyewu, kabyèna bikèngela bwa wêwè kudìvvija mwena tabernacle ewu to, kabyèna bikèngela ànu ùlediibwè mu Bukalenge abu. Mpindyewu, wêwè muswè bwobùmwè bwènu mu ba-Méthodistes, ba-Baptistes, ba-Presbytériens, kwônsò kûdì mubùswilè aku, aci ncikutàngile. Wamònù's, enza bwobùmwè bwèbè ne muntu kanà yônsò ûdì muswè awu. Kàdi mêmè nénkwambilè cintu cìmwèpelè ne: paùdì mulediibwe cyàkàbìdi, udi mumanye ne: "nyuunyi yà masàlà mafwànàngànè..." Ekèlekèle!

¹⁵⁵ Muntu kampàndà wàkankonka mûngà musangu, wàmba ne: “Mwanèetu Branham, wêwè’s utukù mwambile bantu abu ne: ‘Alùkìlaayi ku èkèleziyà wa ba-Méthodistes.’”

Mêmè ne: “Bushùwà’s. Bâbélè pambèlu, nènku bâdi bâshààla kabàyi ne mwaba wà kuyabò to.” Nènku dîbà adi netùmonè . . .

Mbîmpè nànku, bâlukilè, kabyàkwenza ntàntà mule menemene to, nwamònù’s. Kabyàkwenza ntàntà mule menemene to, nebàlukilè buludì.

¹⁵⁶ Nudi bamanyè’s, musangu kampànda mu . . . Noà . . . bwâtù, mwaba wa dikùbiibwa, Noà, kwàkalwa mvùla munène. Nènku ki Noà kulekelelayè cikòlolò bwà kupàtukaci mu bwâtù amu, kàdi kuyaci ànu cyanàànà cyènda cìdila kô-kô ne cìkènzakana eku ne eku. Mòna’s, cyôcì cìvwa cyumvwè bilenga, bwalu cìvwa nciminyì ànu kwinè kwônsò aku. Cìvwa mwà kubùùka kuumuka pa citàlù cìmwè cyà kale, ne kuukucisha difù ne kampundu aka, ne kuya kwàka pa ewu—pa mùkòòkò wà kale ewu ne kuukucisha difù, ne cikwabò cintu, bu mùvvàku ànu mìshindù yônsò yà bitàlù byà kale byà bintu myandanda mwaba awu.

¹⁵⁷ Pa nànku cikòlolò cyôcì cìvwa ànu mwà kusòmba mwaba awu ne kuditilaku kô-kô ne: “Balùmyànà, ki mêmè kutwà cyanga cyà nkààyaanyì eku’s!” ciikàle ànu cìdila ànu kô-kò waci awu.

¹⁵⁸ Kàdi pààkalekelelàbo nkuci mukesè awu bwà kupàtukayè, yéyè ùwwa ne ngiikàdilù mushììlàngàne. Mupùùyà mubolè awu, yéyè “kàvwa mwà kuwùtwàlakù to. Hmm!” Bwa cinyì? Nkuci kàtu ne kanyònga to; yéyè ki nyuunyi umwèpelè udi kàyi ne kanyònga to. Kàvvakù yéyè mwà kubipicisha mu dintùmbu to, pa nànku cintu cìmwèpelè cìvwàye mwà kwenza cìvwa nkwalukila ku bwâtù ne kukookola ku ciibi.

¹⁵⁹ Ndà wêwè ànu kwônsò kûdì muswè kuya aku. Cintu cìmwèpelè cîndìku mêmè nkulòmba bwà kwenza nkubweela ànu mu Bukalenge, kàdi ndi mumanyè kuwàyà. Kwàkupetakù mwà kucitwàla kàbìdì to, mwanèetu, newàmbè ne: “Nkààdi mumanè kupita mukàlu, nkààdi mumanè kushìya maalu à pa buloba aa paanyimà.” Èyowà’s, mukalenge. Ki mùdìbì cyà bushùwà.

Kaa, bàvwa bâdisangìshe mu cibambalu cyà
kuulu,
Bônsò munkaci mwà kusambilà mu Dînà
Dyèndè,
Bààkabàtijiibwa ne Nyumà Mwîmpè,
Ki bukolè bwà mudimu kulwabù;
Mpindyewu cyàkabènzelà Ye bôbò mu ditùkù
adi aci
Yéyè neàkwenzèlè byà mwomùmwè,
Ndi ne disàンka be mûndì mwà kwamba ne ndi
umwe wabò. (Kwêna wêwè naadì anyi?)

Umwe wabò, ndi umwe wabò,
 Ndi ne disànska be mûndì mwà kwamba...
 umwe wabò; (Àlèluuyàh!)
 Umwe wabò, ndi umwe wabò,
 Ndi ne disànska be mûndì mwà kwamba ne ndi
 umwe wabò.

Mbanganyì bàdiku ne disànkà bwà bwalu abu dilòòlò edi?
 Kaa, ekèlekèle!

Lwâku, mwanèètù, kèba dibènesha edi
 Dyàkezulà mwoyi wèbè ku mpèkaatù,
 Dyàbangà kudidisha ngonga yà disànska
 Ne kulama musùùkà wèbè wulàkuka kapyà;
 Kaa, ki kulàkukadì kapyà mu mwoyi wànyì
 eku,
 Kaa, butùmbi kùdì Dînà Dyèndè,
 Ndi ne disànska be mûndì mwà kwamba...
 umwe wabò.

Ndi umwe wabò, ndi umwe wabò,
 Ndi ne disànska be mûndì mwà kwamba...
 umwe wabò; (Àlèluuyàh!)
 Umwe wabò, ndi umwe wabò,
 Ndi ne disànska be mûndì mwà kwamba ne ndi
 umwe wabò.

¹⁶⁰ Mpindyewu patùdì twimba citùminyi cìdì cilonđà eci, ndi muswè bwà nùlabulanganàayi ku cyanza, munùtù nwenza dilòòlò dyônsò amu, ba-Méthodistes bônsò, ne ba-Baptistes, ne ba-Presbytériens. Labùlàngànaayi ku cyanza muntu ne mukwèndè, ne biikàlekù nudyùmvwa ne musàngelu mukùmbànè bwà muntu ùdyà bàzòkà udi mukwèndè mudye, bu wêwè mwà kwenza nànkú. Mpindyewu ikàlaayi ne musàngelu wà menemene, wà menemene, biikàle bamanyè mwà kusòmба ne bakwènù mpindyewu patùdì tuwimba apa:

Ndi umwe wabò, umwe wabò,
 Ndi ne disànska be mûndì mwà kwamba ne ndi
 umwe wabò;
 Umwe wabò, umwe wabò,
 Ndi ne disànska be mûndì mwà kwamba ne ndi
 umwe wabò.
 Nànscha mùdì bantu aba kabàyi mwà kuyiila
 bwà kwikala,
 Anyì kuditàmbisha bwà luumù lwà pa buloba,
 Mbapetè bônsò Mpenta wabò,
 Babàtiijìlbwe mu Dînà dyà Yesù;
 Ne bàdi bàlondelangana mpindyewu, ne kule
 ne ku nseke ne nseke ne,
 Bukolè Bwèndè bùcidi ànu bùmwèbùmwè abu,
 Ndi ne disànska be mûndì mwà kwamba... .

Mpindyewu tùwîmbààyi cyà bushùwà:

Kaa, umwe wabò, umwe wabò,
 Ndi ne disànska be mûndì mwà kwamba . . .
 umwe wabò; (Àlèluuyàh!)
 Umwe wabò, umwe wabò,
 Ndi ne disànska be mûndì mwà kwamba ne ndi
 umwe wabò.

¹⁶¹ Udkù mwà kuswà bwà kwikala mufwile diitabuuja Bwèndè Yéyè pàmwè ne beena Seemùnà anyì? Byôbì bikafikè mu müşhindù wà ne bìvwa bìkèngela bwà wêwè kukùngamangana ne lufù anyì kucyùmusha, udkù mufwànyìne kukùngamangana naalù anyì? Èyowà's, mukalenge. Éyì Nzambì wa yààyà, s'ncifwànyìne kwikala cyà cyènza milòwu's. Èyowà's, mukalenge. Awu ki müşhindù wûndì mêmè muswè kuya, ànu mu cyambilu mene amu. Ncyà bushùwà. Mvwa mwéle meeji ne mvwa mucipetè ne bàvva mwà kucipetela mu Allemagne emu àbìdì àdì pansi aa. Kaa, bàvva mwà kungaashila cingoma ku cyamù cikenkeci cyà lumwènù cyà bufuku, kàdi bàsàlaayì bàà beena Allemagne kulwabò bônsò lubilu kunjìngabò ne kunsokokabò müşhindù ewu. Mêmè kudyàmbidila ne: "Ncifwànyìne kwikala cintu kaayì cilenga bwà kufwà bwà Mukalenge wanyì mu budimi bwà bwambi emu mene." Kaa, ekèlekèle! Cintu kaayì—cintu kaayì cilenga's wè.

¹⁶² Èè, lekèlaayi nnwîmbilèku kaamusambu aka. Ndikù mwà kunwîmbilakù anyì? Nudikù ne—nudikù ne dîbà ànu bwà kaamusambu kakesè cyanàànà anyì? Èyo. Ncyêna mumanyè mwà kukìmba to, ndi nkàmba mu dyakula. Kaa, mêmè's ntu misangu yônsò ànu muswè kwimba's. Ne àmwè à ku matükù àdì pansi aa pawàyà dyàmwàmwa ku cisòmbedi cyèbè cilenga cyà kuulu kwâka mu Mpàladiisò, lwà kwinshì menemene mu ndekeelu mwà meetu mwàmwa, mutwìkalà mêmè ne Russell Creech bayè kalemba nyama emu, udi mumanyè's. Kwinshì menemene mu ndekeelu mwà meetu mwàmwa mùdi kazùbù kakesè kàtù Mwanèétù Neville wimba mu musambu aku ne, *Ngiibàkileku Kazùbù mu Ditumba*, (Mvwa ndyàmbidila ne ùvvwa wàkula bwà nzùbù wanyì mêmè.) mu *Ditùngà dyà mu Butùmbi*. Dìmwè dyà ku maadindà àdì pansi aa pawàpàtukà uya ku lutanda lwèbè lunène kuntwaku, ne ukènzakana müşhindù ewu, lwà kwinshì menemene aku mu ditumba adi neumvwe mutu kampàndà wimba misambu ne:

Ngásà udi ukèmesha! Dîyì dipôle kaayì,
 Dyàkasùngila mukèngeledi wa luse bu mêmè!

¹⁶³ Wêwè udi wamba ne: "Èè, Nzambì àbèneshiibwè, Mwanèétù Branham mukulumpe awu mmufike kùnu. S'ki yéyè awu, ndi mmuumvwa mwimâne mwaba awu mpindyewu mene, mwikàle wimba *Ngásà Udi ukèmesha*."

¹⁶⁴ Necììkalè ngâsà udi ukèmesha awu udi mumfikìshemù. Ncyà bushùwà.

Kàdi ùdi ùzònza mashi, èyowà, (Ki bwà cinyì
mêmè ndi nyiisha Eci.) ùdi ùzònza mashi,
Èvànjeelìyò wa Nyumà Mwîmpè ewu ùdi
ùzònza mashi,
Mashi à bayiidi bààkafwìlà Bulelèlà abu,
Èvànjeelìyò wa Nyumà Mwîmpè ewu
mmutùngùnùke ne kuzònza mashi.

Wa kumpàla wâkafwìla ndongamu ewu wa
Nyumà Mwîmpè,
Ùvwa n'Yone Mubàtiji, kàdi yêyè wàkafwà bu
muntu;
Pashìshe kulwakù Mukalenge Yesù,
kuMupoopelabò pa nkùrusè,
Yêyè ngwâkalongesha ne Nyumà ùvwa mwà
kusÙngila bantu ku mpèkaatù.

Kùvwa Peetèlò ne Pôlò, ne Yone wa kwà
Nzambi,
Bôbô bààkafila myoyi yàbò bwà Èvànjeelìyò
ewu wàmòna mwà kukenkesha;
Bààkasambakaja mashi àbò, mwéñzèlèbo kùdì
baprofetà bàà kale,
Bwà Dìyì dilelèlà dyà Nzambi dyàmòna mwà
kwambiibwa ne meeji matòòke.

Kùdi misùùkà mwinshi mwà cyoshelu,
(bafwìle diatabuuja aba,) yìdila myadi ne:
“Too ne dìbà kaayì?”
Bwà Mukalenge kunyooka Yè aba bàdì benzè
bibì; (Tèelejàayì! Lükàsàlùkàsà!)
Kàdi nekwìkale bakwàbò kàbìdì bààfilà mashi
à mwoyi wàbò
Bwà Èvànjeelìyò ewu wa Nyumà Mwîmpè ne
lukòkà Lwèndè lukùnze kùnzùù alu.
Ùdi ùzònza mashi, èyowà, ùdi ùzònza mashi,
Èvànjeelìyò ewu wa Nyumà Mwîmpè ùdi
ùzònza mashi,
Mashi à bayiidi bààkafwìlà Bulelèlà,
Èvànjeelìyò ewu wa Nyumà Mwîmpè
mmutùngùnùke ne kuzònza mashi.

¹⁶⁵ Kaa, nekwìkalè...

[Mwanèètù wa bakàjì kampàndà ùdi wàkula mu
mwakulu mwenyi, mwanèètù wa balùmè kampàndà ùdi ûfila
dyandamuna. Mwanèètù wa balùmè kampàndà ùdi wàkula
mu mwakulu mwenyi, mwanèètù wa bakàjì kampàndà ùdi
wàkula mu mwakulu mwenyi. Citùpà cyà mukàbà wà mèyì

munda mutupù. Mwanèètù wa balùmè kampàndà ùdi ùfila dyandamuna—Muf.] Butùmbi's wè. Amen. Amen. Hmm. Hmm. Butùmbi's wè. Amen. Èyowà.

¹⁶⁶ Amen. “Ewu udi ne macì à kuumvwa, ūmvwè cìdì Nyumà wàmbila maèkèleeziyà.”

Ndi muMunangè . . .

Kuukwìlaayi mpindyewu, kàdi nùmonè cyènza Ye. Pawìkalà kacya kuyikù muMunangè kwônsò eku to, ûdikù mwà kuswà bwà ûMunangè mpindyewu anyi? Udkù mwà kujuukila kuulu ne kuMujingulula, kuMwangata bu MusÙngidi webè anyì?

. . . mêmè, (Nzambì àkubènèshè, mwanèètù wa balùmè.)

Ne wàkampetela . . .

Muntu mukwàbò ùdikù mwà kujuukila kuulu, kwamba ne: “Ndi Nendè dijinga, mpindyewu mene, ndi muswè kuMunanga anyì”?

. . . Lupàndu

Pa wà Kàvariyo . . .

Nzambì àkubènèshè, mwanèètù wa bakàjì. Nzambì àkubènèshè paanyimà apu, nsongààkajì.

Ndi muMunangè . . .

Ewu udi ne macì à kuumvwa, ūmvwè cìdì Nyumà wàmbila èkèleeziyà.

. . . Yêye wàkannanga kumpàla

Ne wàkampetela lupàndu

Pa muci wà Kàlvariyo . . .

¹⁶⁷ Taatù wetù wa mu Dyulu, paÙdì umònà bàsàtù aba biimànyìne kuulu apa, Éyi Nzambì, ndi ndòmba bwà Wêwè kwikalakù ne luse, Éyi Wa Cyendèlèlè Wanyi, ne bwà kubàfwìla luse ku mpèkaatù yônsò, ne lupàndu, Nyumà Mwîmpè mu nsòmbelu wabò, bwà kabàlu kulengiibwa kùdi lufù lwibidì to. Bâdi bâfika ku dyumvwa, Mukalenge, dilòòlò edi, pàdibo biimàne mwaba awu apu, ne—ne kùdi cintu kampàndà cìdì pabwîpì. Nyumà Mwîmpè ngudi mufile didîmwija awu. Pa kumònà Nyumà wa Nzambì wìcikila munkaci mwà bantu, kuMumònà ùkwâta mudimu ànu bilondèshìle Mifùndu menemene, ànu mikjenji yìsàtù cyanàànà kàdi kwimanyika. Éyi Nzambì, mukenji bwà muntu ne muntu.

¹⁶⁸ Mpindyewu, Taatù, tudi tuKulòmba bwà kwikala ne luse. Lekèlaku Nyumà wa mushinga mukolè awu àshaalè munkaci mwètù. Swàku bwà tûMuneemèkèku, Nzambì; enzàku nànnku. Bwejàku misùùkà eyi mu bukùbì Bwèbè, Taatù, yìdi mmamuma à ku Diyishà dilòòlò edi, ne à ku mukenji wà kùdi Nyumà Mwîmpè wùdì mwambiibwe munkaci mwètù. Nènku tudi tulòmba, Taatù Nzambì, bwà Wikalakù naabò matùkù ônsò à

mwoyi wàbò. Ne swàku bwà “mu buloba bwà kabuyi ndekeelu” amu twatwilanganamù naabò, basÙngila kÙdì Mashi ne ngâsà wa Kilstò. Tudi tuKupèeshabò mpindyewu, Taatù, bÙjèku ne Nyumà Mwîmpè Webè. Bwalu tudi tulòmba nÙnku mu Dînà dyà Yesù. Amen.

¹⁶⁹ Nzambì ànÙbènèshè, bânà bÙètù bÙà balÙme. Yônsò uvwakù pabwípì ne bantu bÙvwà biimàne kuulu abu, beena Kilstò abu, bÙlabÙlèku ku cyanza pÙdibo basÙmbe pansi apu, ÙbÙpÙèshèku... ÙbÙjingilèku dyÙkalenga dyà kÙdì Nzambì.

¹⁷⁰ Nudi numònà mùdì Nyumà Mwîmpè ne ditÙmikila, mùdì Ye ÙcyÙenza ànu ku ndekeelu mene amu anyì? Nwamònu anyì? Bible mmwambè ne: “Aba bÙdì... bÙdì bÙàkulà mu myakulu biÙkalè bÙbÙdì, anyì kabayi... bÙbÙ bÙàbÙngì basatu,” nudi numònà’s. Kí mmukenji pÙncÙvwa nyiisha apu to, mpÙkaavwÙwu wÛnsò mananè kujika. Kí mùshindù wÙdibi ne cyà kwikala, bantu bÛnsò biikÙle mu kaneemu kÙà menemene ne bÙtÙeleja cÙdì Nyumà wÙmÙba. KÙdi cyÙnzÙkì ncinyì? BangÙnzÙmpÙkÙtÙ bÙjuukÙ bwà kunyingalalabò. Kaa, anji elÙayi meeji. Nyumà Mwîmpè YÙyÙ mwinè, kÙyi ÙcyÙngata to... ne ku DÙyÙ mene, mmulwÙ ne mwenzÙ dimwÙneshiibwa.

¹⁷¹ Ndi mumanyÙ bÙmwÙ bÙà ku bantu bÙdì bÙàkulà mu myakulu aba, ndi mumanyÙ bÛnsò bÙsÙtÙ bÙkÙlÙ aba; ne ndi—ndi mumanyÙ bÙfidi dyandamuna abu; ndi mumanyÙ ne nsÙmbelu wabò kÙna ne mpÙkaatÙ kumpÙlÙ kwà Nzambì to. MwanÙtÙ Neville ewu, mpaasÙtÙ wetÙ, mwambi wa ba-Méthodistes; mmwambi wa ba-Méthodistes, musÙmÙbe mwab’ewu, mupetÙ Nyumà Mwîmpè. Junie, udi apa ewu, MwanÙtÙ Jackson, muiishi mukwÙbÙ wa ba-Méthodistes, mupetÙ Nyumà Mwîmpè. Ncyà bushÙwÙ, biikÙle ne dipÙ dyà kwakula kwà mu myakulu ne dyandamuna.

¹⁷² NÙnku nudi numònà mutÙdì tuditÙwala mu èkÙleeziyÙ, muntu ne muntu mu kaneemu; Nzambì ngudi wakula awu. Nudi numònà mùdì Ye wÙkÙla menemene bilondÙshÙle Bible; umwe; mukenji kawÙyi wÙmvwika ànu bÙmpÙ menemene to, Üdi ÙwÙmÙba cyÙkÙbÙdì, kÙdi KÙyi muswÙ kwakula kupÙta pa misangu yÙsÙtÙ to. nwamònu’s, bilondÙshÙle MifÙndù mwaba awu. Nwamònu’s, YÙyÙ ki wafila mukenji awu; Kacya YÙyÙ kÙtÙkÙ ÙbÙbÙwejakajangana to, “bwalu nyumà wa bapÙfetÙ Ùdi ÙkÙòokÙla muprÙfetÙ.” BÛnsò bÙdì bÙtÙeleja mu cimÙmÙ cyÙonsÙ...

¹⁷³ Mpindyewu mùshindù awu ngÙvvÙ wÙkÙngelÙ bwà èkÙleeziyÙ kwikalayÙ mu bulongÙme. Mpindyewu bwà nwÙnÙ bÙdì mwÙ kwikala kaaba aka bafÙmÙne pambÙlÙ, bÙdì bangumvÙwÙ ncyÙmÙba, mùshindù awu ngÙvvÙbÙ bÙkÙngelÙ bwà kwikalabÙ. Nwamònu’s, mukenji wÙdi wÙpÙtÙka. Nudi numònà bipeta abi anyì? Cidi cyÙnzÙka ànu pa dÙbÙ adi mene. Cintu kampÙnda cidi cyÙnzÙka, ànu menemene mùdì dijingulula anyì

nyumà mukwàbò kanà yônsò ewu. Yéyè kî mmulenga wa dikèma anyì? Kaa, mêmè's ndi ne disànkà dyàbûngì dyà kumanya ne ncintu cìmwècìmwè cìvwà Pôlò Munsantu mutùme dîyi bwà kwenjiibwaci aci, *apa* mene, kî ncifwè to too ne *apa*. Cícidi ànu cintu cìmwècìmwè aci. Kaa, ndi ne disànka be mûndì mwà kwamba ne ndi umwe wabò. Kî mmwômò anyì? Èyo.

¹⁷⁴ Mpindyewu, mààlabà dilòòlò pa dîbà mwandamutekète jaajaaja, netwàngatè cikondo cyà Laòdikiyà, ne ki cikondo cyà *dibàkà* ncyôci aci. Ndi muswè bwà nwâlwayi panwikalà ne mùshindù. Mvwa mulwè ànu pashiishe ndambù dilòòlò edi, bwalu pàmwäpa Nyumà Mwîmpè ngudi wakula ne bikwàbò. Kàdi dîbà dîcìdì ànukù, tucìdì ànu bu tusunsa makùmi àbìdì nànkù awu paanyimà pàà dîbà citèémà. Kàdi pa ciibidilu ntu mwab'ewu pa dîbà dikùmi anyì dikùmi ne ùmwè, pa nànkù aci nkumpàlà kwà dîbà menemene. Ne nwénù pèènù nudi nusànkila ma—ma—mayiisha à Mukalenge anyì? Nudi nuàsànkila cyà bushùwà anyì? Adi àdiìsha musùùkà wèbè.

¹⁷⁵ Nzambì ànùbènèshè, nwénù bâna bàànyì. Nudi bamanyè's, mêmè ntu munùnangè ne mwoyi wànyì wônsò. Ne míngà misangu pàdì Nyumà ûmpya, údi ùkòsa byônsò bìbìdì... Mûshindù awu ki wùdì Dîyi, nDisàkisha mùdì mwelè wà mvità wà nseke yìbìdì amu. Dìdi dikòsa mu dilwa, mu diya, munda, pambèlu, mu nseke yônsò. Kàdi aci ki cìdì cítutengulà's. Ditengula dìdi dikòsa ànu mubidi wà pamutù awu, bintu bivwà kabiyi bikèngela bwà twétù kwikala naabi abi.

¹⁷⁶ Mpindyewu, ndi muswè bwà nùmonè. Nuumvu Nyumà mu dyandamuna amu dilòòlò edi anyì? "Imànyìkà dikùtakana adi!" Aci ncìdì cítengulà. Ikàlà ne meeji matòooke! Twétù bônsò tudi bapàtuke mu njila, kàdi Nzambì ngudi mumanyè mwà kukòsa bikùnàkùnà abi kutùdì. Kî mmwômò anyì? Ncyà bushùwà ne ki cìdì Ye wènza. Mêmè ndi ne kusàkidila bwà bwalu abu. Kî mmwômò anyì?

¹⁷⁷ Wêwè ki mwimbi mukesè wa cisanji cyà pyànô kaaba aka anyì? Ncyéna mumònè... Teddy ùdi...? Ncyéna mumumònè kaaba aka mu mwaba nànsha wùmwè to. Ewu ki—ki...? Èyo, mwanèètù wa bakàjì, bu wêwè mwà kuswà. Awu mmwanèèbè wa bakàjì anyì, Mwanèètù Daulton? Mukàj'a mwanèèbè. Èyo. Inábànzà mutekète wa maalu mímpè matàmbe, ndi ne disànka be dyà mûdì mwena Kilistò. Èyo, musambu wètù mulenga wà kale wà ditangalajangana naawù awu ngwépì? Tûteetààyi wùmwèpelè, kumpàlà kwà twétù kucyènza, mpindyewu. Indìlakù kakesè, mwanèètù wa bakàjì, kumpàlà kwà twétù kwimba *Angàtà Dînà Dyà Yesù Wéndè Naadi*.

¹⁷⁸ Mbanganyì bàdì bamanyè *Kanùpu Mwoyi Disambila Dyà Mu Dikù?* Mbanganyì bâtù bàsambilà mu díkù dyàbò, díkù dyèbè disambila? Kaa, abi's mbîmpè. Tûcîteetààyibì musangu wùmwè, ànu mùvvwà mu bikondo byà kale abi mpindyewu:

Kanùpu mwoyi disambila dyà mu díkù to,
 Yesù ùtu muswè kutwìlanganamù neenù;
 Yéyè neàngatè lutàtù ne lutàtù lwènù lwônsò,
 Kaa, kanùpu mwoyi disambila dyà mu díkù to.

Nutu banangè aci anyì? Tùcìteetààyi cyákàbìdì:

Kanùpu mwoyi disambila dyà mu díkù to,
 Yesù ùtu muswè kutwìlanganamù neenù;
 (S'ncipungidi, nwénù benza.)

Yéyè neàngatè lutàtù ne lutàtù lwènù lwônsò,
 Kaa, kanùpukù mwoyi disambila dyènù dyà
 mu díkù to.

¹⁷⁹ [Mwanèètù wa bakàjì kampàndà ùdi wàamba ne: “Mwanèètù Branham, ndikù mwà kwamba cintu kampànda anyì?”—Muf.] Ncyà bushùwà ne udi mwà kwamba, Mwanèètù wa bakàjì. [Mwanèètù wa bakàjì awu ùdi ùbanga kwakula. Katùpà kàà mukàbà wà mèyi munda mutupù.] Mwanèètù wa bakàjì Nash, abi's mbilenga be. Kaa, bu wêwè ànu mwà:

Twêtù batwîshìibwe katùyikù twela mpatà to,
 ncyà bushùwà ne Yéyè neàkupàtùlè;
 Ndà wêwè ànu ne majitu èbè kùdì Mukalenge
 pashìishe ûàshiyèku.

Ûàshiyèku, ûàshiyèku
 Ndà ne majitu èbè kùdì Mukalenge ne
 ûàshiyèku;

Twêtù batwîshìibwe katùyikù twela mpatà to,
 ncyà bushùwà ne Yéyè neàkupàtùlè;
 Nda ne majitu èbè kùdì Mukalenge ne
 uàshiyèku.

¹⁸⁰ Kanùtukù banangè misambu yà kale ayi anyì? Kaa, mêmè's ntu ànu... Ntu ngeela meeji ne bantu abu bààkangata kasàlà abu bàvwa bàson sodìibwà kùdì Nyumà Mwímpè bwà kubala cyôcì aci.

¹⁸¹ Byenzè bu mpofo Fanny Crosby pààkateetà bantu bàà pa buloba bàà mu dítükù adi abu bwà kumufikisha ku difùnda misambu yà pa buloba, bôbò ne: “Mòna’s, wêwè’s newìkalè mukàjì mubanji.”

Yéyè ne: “Mêmè ndi mulàmbùle mwoyi wànyì kùdì Kilistò, ne dipà dyànyì dyônsò.” Ùvwà mpofo, nudi bamanyè's. Yéyè ne: “Ndi—ndi ne dibànzà dyà kufila mwoyi wànyì ne byônsò kùdì Kilistò.” Yéyè ne...

¹⁸² Nènku díbà adi bàvwa bàmukwàcila ciiji bwalu wàkadyombola mpùngà wa nànku awu. Yéyè kààkапàànyisha bwanààbutè bwèndè mùvwà Mukalenge Presley ne bakwàbò abu bènze to, kàdi yéyè—yéyè wàkashaàla mulamè bululàmè bwèndè. Pa nànku yéyè—yéyè... Bôbò—bôbò kumulekela, bàmba ne: “Díbà adi pawàfikà mu Dyulu, kwôkò kwikàle

mwaba bu nànkú,” bôbò ne, “wêwè bu mûdî apa emu, s’newìkalé mpofo.” Bôbò ne: “Kàdi wêwè *mwikàle* mpofo,” bôbò ne, “udi mufwànyine kuMumanya bishi?”

Yéyè ne: “Mêmè’s nêmMumanyè. Mêmè’s nêmMumanyè.”

Bôbò ne: “Kàdi wêwè *mwikàle* mpofo? Kàdi wêwè *mwikàle* mpofo?”

Yéyè ne: “Nêngúmvwè ku dilenga dyà bibangu byà misonso abi.” Dîbâ adi yéyè kukùdimuka, kwasa lwèndu kwalukila, ne kwambayè ne:

NêmMumanyè, nêmMumanyè,
Ne nêngìmanè mupikula ku luseke Lwèndè;
NêmMumanyè, nêmMumanyè
Ku bibangu byà misonso mu byanza Byèndè.

¹⁸³ Éyì Yesù wanyì, ne mpùtà yìtaanu yà mushinga mukolè ayi, yìdi yìzòloloka mashi bwànyì mêmè kuntu kwàka, mmunyì mûndìku mufwànyine kuvila Yéyè wa mushinga mukolè awu? Ndekèlè mfwe, ndekèlè nye... Nye mùyaayà nî ncinyì cyônsò, kàdi ncividikù Yéyè wa mushinga mukolè uvwa uzòloloka mashi kuntu kwàka wâkamfwìla awu nànsha. Éyowà.

¹⁸⁴ Nènku paùdì umuka dilòlò edi apa, udi muswè kwangata: *Angàtâ Dînà Dyà Yesù Wèndè Naadì*. Eyo, mwanèètù wa bakàjì. Tujuukilààyi kuulu mpindyewu, bônsò cyàpàmwe.

...Dînà dyà Yesù wèndè naadì,
Wêwè mwânà wa tunyinganyinga ne dikènga;
Nedikupè disànska ne busàmbi,
Ndà naaDi kwônsò kûyaayà.

Dînà dyà mushinga, (Dînà dya mushinga!) Éyì dyà bupòle be! (Éyì dyà bupòle be!)
Ditèkemena dyà buloba ne disànskà dyà Dyulu;
Dînà dyà mushinga, (Dînà dya mushinga!) Éyì dyà bupòle be!

Ditèkemena dyà buloba ne disànskà dyà Dyulu.

Mpindyewu patùdì twinyika mitù yètù, ne twimba bitekètebitekète apa:

Twinamina Dînà dyà Yesù,
Tupòna mikookwela ku makàsà Èndè,
Mfùmù wa bamfùmù mu Dyulu netùMwasè cifulu cyà butùmbi,
Pààjikà lwèndu lwètù.

Dînà dyà mushinga, Éyì dyà bupòle be!
Ditèkemena dyà buloba ne disànskà dyà Dyulu;
Dînà dyà mushinga, Éyì dyà bupòle be! (Dyà bupòle be!)

Ditèkemena dyà buloba ne disànskà dyà Dyulu.



CIKONDO CYÀ ÈKÈLEEZÌYÀ WA SEEMÙNÀ LUA60-1206
(The Smyrnaean Church Age)

DILONDANGANA DYÀ MALONGESHA PA DIBUULUDIBWA DYÀ YESÙ KILISTÒ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diibidì mu dilòòlò, mu matùkù 6 à ngondo wa ciswà-munène, cidimu cyà 1960, ku Branham Tabernacle mu Jeffersonville, mu Indiana, U.S.A. Ndyumusha pa mukaba wa mèyi ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lüntândalà, kulamiibwa mu cikàlwîlà, kukudimunyibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org